

मरकुस की लिखीं आछी खबर

भूमिका

मरकुस की लिखीं आच्छी खबरा कि सुरुवात ऐथु बाता लेयाई अं “परमेश्वर का बेटा ईसा मसी कि आछी खबर” ऐथु किताबा पाण्डा ईसाक एक स्याणा अंर काम करनअ वाड़े आदमी के रुप मुंझ राखा देखाई, तेसका अक सिखाणच, दुष्टांगुच अंर लोगु के पाप माफ करनअ के अरनीप्रगट अवा, ऐथु पाण्डो ईसा खुद आपुक आदमी का बेटा बोलअ। सो ऐथु अरनीआया कि लोगुक तिऊके पापु से माफी देण के अरनीआपड़ी जान देला

लिखनं वाड़ा मरकुस ईसा के सिखाणच अंर बाताऊंच जादा जोर देईना पर तेसके करीए कामुच जोर देवं। ऐथु अरनीसो तेसकी कथा सिदे-सादे रुप मुंझ लिखीं। यऊना नाईण कराण वाड़ा अंर ईसा का नाईण अंर ईसा को परेखण के बारे मुंझ कम लिखीं। लिखनं वाड़ेई ईसाएँ लोगुक ठीक भाणने अंर तेसके सिखाण अंर तेसके काम के बारे मुंझ लिखो। जेसा-जेसा बखत बितंदा लागा तेसे-तेसे तेसके चेले ओर आछे ढंग से समजंदे लागे पर ईसा के दुसमन ओर खराब अंदे लागे। ईसा को कुरुसंच मरनं अंर मरी करी पछी जिऊंदो जाण जादा बड़ी बात अ।

रूप रेखा

आछी खबर कि सुरुवात 1:1 - 13

गलील मुंझ ईसा की जनसेवा 1:14 - 9:50

गलील से यरुसलेम दूरी की यत्रा 10:1 - 52

यरुसलेम मुंझ आखरी अप्ता 11:1 - 15:47

ईसा को मरी करी पछी जिण 16:1 - 8

ईसा को जिण, देखाऊण, अंर स्वरग मुंझ जाण 16:9 - 20

यऊना का परचार

1 परमेश्वर के बेटे ईसा मसी की आच्छी खबर की सुरुवात
2 जेसो परमेश्वर के बाकी यशाया के किताबा पाण्डो लिखीं,
“देख आऊँ आपड़ा दुत ताऊँ आगीण्डा बेजदा सो तेरे अरनी बाट
भाणदा **3** बणंदी एक भाष सुणुणी कि, प्रभू के आणके
अरनी बाट भाणो, अंर सड़काऊँक सिदी करो”

4 यऊना बणंदा आया, जा नाईण ता देवं अंर परचार ता करअं कि, “आपड़े पापुक छोडो अंर नाईण करो अंर परमेश्वर तारे पापुक माफ करदा।” **5** सारे यऊदीया मुलुक अंर यरुसलेम के सब रणू वाड़े तेस ढाई आऐ अंर आपड़े पापुक मानेअं, अंर तिऊँक तेणे यरदन नदीयांदा नाईण करा **6** यऊना ऊँट के मुण्डाव के गटूण ता बीडं अंर कमरअं पुण्डो खालाको मंजण ता भादं अंर सटकुवे अंर बणमंअ ता खावं **7** अंर या परचार ता करं कि जा मेरे बाद आण वाड़ा अ सो मुँ से जादा सक्तिशाली अ अंर आऊँ तेसके जूते के तणीयाँ भादनं के

लाईक बी आथीना ⁸आऊँ त तूँक पाणी मुंझ नाईण कराऊँ, पर सो तूँक सुच्चे आत्मा लेई नाईण करांदा।

ईसा का नाईण अंर तेसके परेखणा

⁹तला के दुसु मुंझ ईसा गलील मुलुक के नासरतंई आ अंर यरदन नदीयांदा यऊना बेरी नाईण लिया ¹⁰अंर जबी सो पाणी मुंझी उबा आणा, तबी तलाई गईण खुली नठी अंर परमेश्वर के आत्माक कबुतरके जेसी तेसीच उतरन्दुई देखी ¹¹अंर गईणी बी ऐई भाष आई कि, “तु मेरा प्यारा बेटा अ अंर आऊँ ताऊँसे भरी खुस अ।” ¹²तबी तलाई तेसके परमेश्वर के आत्माई बणंदा जाण के अरनीमजबुर करा। ¹³अंर चालीस दुस दुरी शेतानएँ तेसके बणंदा परखां अंर सो बंण मिरगूँके सात रणा अंर स्वरगदुत तेसकी सेवा ते करंअ।

ईसा के पोईलके चले

¹⁴यऊनाक जेला पुण्डा गटनं के बाद, ईसा गलील मुंझ आ अंर परमेश्वरअ के राज्य की खुस खबरी सुणाई ¹⁵अंर तेणे बोलो कि, “बखत पूरा अई गोवा अंर परमेश्वरअ का राज्य नजदीक आई रा, अंर पापु से जीऊ बोऊड़ाओ अंर खुस खबरीयाक दिजो।”

¹⁶गलील झीला के छेवं-छेवं पुण्डा जांदुई ईसाएँ शेमोन अंर तेसका भाई अन्द्रियासक झीलांदे जाओ फेरकांदुई देखे, काईकी सो माच्छी मारनं वाड़े ते ¹⁷ईसाएँ तिऊँक बोलो कि, “तुवें मुँ पछीण्डे आओ, आऊँ तूँक आदमी के पाकड़ण वाड़े भाणदा।” ¹⁸तिवें तलाई आपणे जावे छोडे अ अंर तेस पछीण्डे चल पड़े। ¹⁹अंर किछ आगीण्डे जाई करी, तेणे जबीदी का बेटा याकुब अंर तेसका भाई यऊनाक नावीच जावे स्वारदुई देखे। ²⁰तेणे तलाई तिऊँक बोईदे अंर सो आपड़े बाबा जबीदीक मजदुरुं के सात नावीच छोड़ी करी ईसा पछीण्डे चल पड़े।

दुष्टांग छोडाओ

²¹तबी ईसा अंर तेसके चले कफरनुम आएँ अंर यऊदिऊँ के बेठोज के दुस, तिऊँके के दियाण्डे पुण्डे जाईकरी सो सिखांदा लागा। ²²अंर सारे आदमी तेसके बातु सुणी करी ताजुब रे अई काईकी सो तिऊँक सास्त्रिऊँ के जेसो बोली नु ता पर स्याणे के जेसो रोब से ता बोलअ।

23तेथु दियाण्डे पुण्डा एक आदमी ता जेस पाण्डो दुष्टांग तो लागीए 24तेणे ललीयाई करी बोलो, “ओ ईसा, नासरी गावं का, आमुक ताऊंसे का काम अं? का तु आमूक खत्म करदा रा आई आऊं ताऊंखे जाणु अं की तु कूणअ? तु परमेश्वर का सुच्चा आदमीअ।” 25ईसाएँ दमकाई करी बोलो, “चुप-चाप रअ अंर तेस बितोडी धुर नठ” 26तबी दुष्टांग तेसके मोरोडी करी अंर जोर से चिंगाटुई करी तेस बितोडी धुर नठो। 27तबी एतु देखी करी लोगुंक सुच बेठी अंर आपस मुंझ बोलअदे लागे एजी का बात अ? ऐजी कोजी बात अं जेतुक दुष्टांग बी मानअं 28एथु बजेसे गलील अंर तेथुके अड़ोस-पड़ोस के मुलकंदा ईसा का नाव फईली नठा।

भरी बीमारुक ठीक करने

29तबी सो तलाई दियाण्डे पुण्डी धुर नठी करी याकुब अंर यऊना के सात शेमोन अंर अन्द्रियास के दारके पोऊंछे। 30शेमोन की सासुवाक बुखार ते लागीई आदे अंर तियुँ तियाँके बारे मुंझ ईसा बेर बोलो 31तबी ईसाएँ तियाँ बेटकुड़ीया ढाई जाई करी तियाँका आत पकड़ाअ अंर ऊभी ऊजीयाई अंर तलाई तियाँका बुखार उतरी नठा अंर सो तिऊंकी सेवा पाणी करदी लागी। 32अंर पाछा के बखतअ जबी दुस डुबदो लागो तबी जे बिमार ते अंर जिऊं पाण्डो दुष्टांग तो लागीए तिऊंक ईसा ढायालेए 33अंर सारे गावं के लोग तिऊंके दारके कठे अरे। 34अंर तेणे भरीसी लोगुंक भांती-भांती के बिमारीया से आछे भाणे, अंर भरी आदमी पाण्डो दुष्टांग तो पिड़चियें सेजो बी तेणे धुर खेराई अंर ईसाएँ दुष्टांगक बोलअनई ना देनं काईकी सो तेसके पछीयाण तो कि यो कूण अ।

ईसा मसी की पराथना

35रातीये बखतअ दूस निकड़ण से पोईले ईसा उजूई करी एक सुनसान जागाच नठा। अंर पराथना करदा लागी। 36तबी शेमोन अंर तेसके साती ईसाक ऐरदे लागे। 37जबी सो मिली गोवा तबी तिऊंई तेसके बोलो कि, “ताऊंख सबुए लेया ऐरी।” 38ईसाएँ आपड़े चेलीक बोलो, “चालो आमे ओके गावदे जामे की आऊं तेकी बी लोगु के बिचंदा परचार करी सकंमा, काईकी आऊं एतुई अरनीरा आई।” 39अंर तबी सो सारे गलिल मुलुक के दियाण्डी पुण्डा नठा अ अंर

परचार करा, अंर जिऊँ आदमी पाण्डो दुष्टांग तो पिड़चिये तेथुक तेणे धुर खेराओ।

कोढीक आछा भाणना

⁴⁰एक कोढी आदमी ईसा मसी ढायाआ, अंर सो तेसके गोडी मुंझ रुड़ा, अंर कोढीऐ बोलो कि, “प्रभु जे तु चाएँअ त मुख ठीक सके भाणी” ⁴¹अंर ईसाक तेसीच दया आई अंर तेणे आपड़ा आत आगीण्डा बढाई करी तेसके छुआ, तेणे बोलो कि, “आवं ऐजो चाऊँ कि तु ठीक चाए गोवा।” ⁴²अंर तलाई सो ठीक गोवा। ⁴³अंर ईसाएँ कोढीक समझाई करी बेजा ⁴⁴कि, “कसी बेर किछ नु बोलीया पर जाईकरी आपुक परोईतअ बेर देखा अंर मुसाएँ जेई ठीक अण कि बेंट राखी ठईराई सेजी चड़ा कि ऐई तेरी लोगु के बिचंदी ठीक अण कि गबाई अंदी।” ⁴⁵पर कोढीएँ भाण्डे जाई करी लोगु के बिचंदा परचार लागा करदा, ऐथु बजेसे ईसा दुबारे बजारंदा खुला ना सका गुमी अंर सो एक सुनसान जागाच रंदा लागा पर सारे जागाऊँची लोग तेस ढायाआंदे रे लागी।

अदरंग के मरीजक ठीक भाणना

2¹किछ दुसूँ के बाद सो पच्छीं कफरनूम आ अंर लोगुंक पता चला कि सो दारकेई अ। ²तबी इछे लोग कठे अऐ की दारके सेवणी राखन की बी जागा नू ती आथी। अंर ईसा तिऊँक बचन ता लागीऐ सुणांदा। ³किछ लोग आऐ अ तिऊँ मुंझी चार आदमीऐ एक अदरंग के मरीजक चुंगी करी ईसा ढाई लेया। ⁴पर बीड़ा के बजेसे सो तेस ढायाना सके पऊछी तबी ऐथु बजेसे जेतु कुड़े पुण्डा ईसा ता तिऊँई तेथुको छांपंर ऊखाडी करी मरीजक चरपाया सुदा लटकाई करी बितरांदा देना छोड़ी। ⁵ईसाएँ तिऊँका बिसवास देखी करी तेस बिमार आदमीक बोलो कि, “बेटा, तेरे पाप माफ अऐ।” ⁶तबी जे तेऊड़े सास्त्री ते बेठीऐ, सो आपड़े-आपड़े जियंदो सोचदे लागे। ⁷कि या आदमी एसो काई बोलअअ? यो त परमेश्वर की बुराई करअ परमेश्वरक छोड़ी करी, ओर कूण सकं, पाप माफ करी? ⁸ईसाएँ तलाई पाओ जाणी कि ऐ लोग आपड़े जियंदो का लागीऐ सूचदे, तबी तेणे तिऊँक बोलो कि, “तूँवें आपड़े जियंदी ऐई बाता काई सूचोअं? ⁹सुखो काअं? अदरंग के मरीजक एसो बोलअन, की तेरे पाप माफ अवे, या एसो बोलअन, कि उजु आपड़ी चरपाई चुंग अंर

हाण्ड फिर ¹⁰पर जेतु लेई तुम जाणी पाले की आदमी के बेटेक ऐथु धरतीयाच पाप माफ करनअ का अक आ।” तेणे अद्धरंग के मरीजअं बेर बोलो, ¹¹“आऊँ ताऊँखे बोलूँ, उजुऊँ, आपड़ी चरपाई चुंगं अंर आपड़े दारके जा।” ¹²सो तलाई उजुणा अंर आपड़ी चरपाई चुंगी अंर सबु के सामणी बाण्डा नठा अंर सारे आदमी ताजुब रे मानी, अंर तिवे सबुए परमेश्वर की बढ़ाई करी अंर बोलो कि, “आमे एसो कदी ना देखो।”

एक लेबी नावं के आदमीक बोईदणा

¹³तेतियाँ बाद ईसा गलील झीला के छेंव पुण्डा नठा, अंर सारी भीड़ तेस पंछीण्डी आई, अंर सो तिऊँक शिखांदा लागा। ¹⁴जांदुई बेरा तेणे अलफई का बेटा लेबीक चुंगी चोकीयाच बेठीये देखा, ईसाएँ तेसके बोलो कि, “मूँ पंछीण्डा आ,” अंर सो उजुणा अंर तेस पंछीण्डा आण्डदा लागा। ¹⁵जबी ईसा अंर तेसके चेले लेबी के बितरे खाण खांदे बेठे तबी भरीसे चुंगी लेण वाड़े अंर पापी आदमी बी तेवड़े बेठे अंर भरीसे ऐसनेई लोग ईसा पंछीण्डे आण्डदे लागे। ¹⁶जबी सास्त्रीयूँ जे फरसि ते एजो देखो की यो त चुंगी लेण वाड़े अंर पापी आदमीयूँ के सात खाअं-पीअं अ। तबी तिऊँवेँ तेसके चेलीक बोलो कि, “यो चुंगी लेण वाड़े अंर पापीऊँ के सात काई खाअं-पीअं?” ¹⁷ईसाएँ एजो सुणी करी तिऊँक बोलो, “आछे बिछे आदमीक बेदअ की जरवत आईना, पर बिमारूक अ। आऊँ दरमी आदमीक बोईदंदा रा ना आई, पर पापी बोईदंदा रा आई।”

बरतअ का प्रश्न

¹⁸यऊना के चेले अंर फरीसी बरत ते राखं, तबी किछ आदमीएँ आई करी ईसा बेरी पुछो, “यऊना के चेले अंर फरीसी के चेले बरत काई राखं? पर तेरे चेले काई ना राखी?” ¹⁹ईसाएँ तिऊँक बोलो, “जा दुरी दुला जोजोड़ी के सात अ का जोजोड़ीए बरत राखी सकं? जा दुरी दुला तिऊँके सात अ जोजोड़ीये बरत सकीना राखी। ²⁰पर सो दुस बी आंदोअ जबी दुलेक जोजोड़ी से अलग करदे तबी सो बरत राखदे। ²¹कुणीए बी नए कपड़े की टाली, पुराणे गटुणू पाण्डी ना लाई काईकी नई टाली पुराणे गटुणूक खाईची करी ओर बी चिरी देंदी। ²²नई सूर पुराणे खलटेंदी कोई ना राखी काईकी नई सूर

पुराणे खलटेक फुटोई देंदी सूर अंर खलठा दुयांई खतम नठदी अई एतु अरनीनई सूर नवे खलटेंदी भरअं।”

बेठोज का प्रभु

²³एसो ओ कि ईसा अंर तेसके चेले बेठोज के दुस डोखरी बाटू ते रे जांदे लागी, अंर तेसके चेले आण्डदुईआण्डदुई सील तोड़दे लागे। ²⁴तबी फरीसीएँ बोलो, “यो बेठोज के दुस ऐसा काम काई करअं, जा ठीक ना आथी” ²⁵ईसाएँ बोलो कि, “का तुमें दाऊद के बारे मुंझ पढोना? जला दाऊदक अंर तेसके सातकिक बूक लागी तबी तेणे का करो? ²⁶जला अबियातार बड़ा परोईत ता तला दाऊदई मंदीरं पुण्डे जाई करी भेंटा के चड़ाईए कोदुए आपु बी खाई अंर आपड़े सातकिक बी खियाई, जेतुक पुजारीक छोड़ी करी ओर कुणीयेई ना खाई।” ²⁷तबी ईसाएँ तेसके बोलो, “आदमी बेठोज के दुस के अरनीआना, पर बेठोज को दुस आदमी के अरनीअ। ²⁸इतु अरनीआदमी का बेटा बेठोज के दुस का बी स्याणा अ।”

सुकिये आतके आदमीक ठीक भाणना

3¹तबी ईसा फेर यऊदी लोगु के दियाण्डे पुण्डा नठा, तेकि एक आदमी ता जेसका आत ता रा सुकी ²अंर किछ लोग ईसाच गलती लाण के अरनीएरदे ते लागीए की यो बेठोज के दुस ऐसके ठीक करअं की करीना। ³ईसाएँ तेस सुकीए आतके आदमीक बोलो, “बिचंदा खडा अ।” ⁴तबी तेणे तिऊँक बोलो, “का बेठोज के दुस भलो करनअ ठीक अ, की बुरो करनअ? कसकी जान बचाणी ठीक अ, की कसके मारनं अ?” पर सो सब चुप रएँ। ⁵ईसा तिऊँके धड़े जियक देखी करी उदास नठा अई, अंर तेणे गुस्से मुंझ ऊण्डो पुण्डो ऐरोअ, अंर तेणे तेस आदमीक बोलो, आपड़ा आत देऊण्डा, अंर तेणे देना, अंर तबी तेसका आत ठीक गोआ। ⁶तबी फरीसी तलाई भाण्डे जाई करी ईसाक मारनं के अरनीएरोदि लोगु^a के सात मिले।

भरी आदमी ईसा पछीण्डे अणे

⁷ईसा आपड़े चेली के सात झीला के बिला नठा, अंर गलील मुलुकई एक बडी भीड़ तेस पछीण्डी आई। ⁸यऊदिया, यरुसलेम, इदूमिया अंर यरदन नदी के पाइले बिलाए अंर सूर अंर सेदा के ऊण्डोड़ी पुण्डोड़ी लोग तेसके कामु के बारे मुंझ सुणी करी तेस ढाई

^a गलील के राज्यपाल ऐरोद के पालटी के आदमी।

आए। ⁹बीड़ा के बजे से तेणे आपड़े चेलीक बोलो कि, “मेरे अरनीएक नान्द्री नाव तियार राखो ताकी भीड़ मुंखे गेरी नु सकंली।” ¹⁰काईकी तेणे भरी बिमारुक ठीक ते राखे करी, एतु बजेसे जिचे बिमार लोग ते तेसके छुण के अरनीतिवें दाका मुकी ती लेई करी। ¹¹अंर दुष्टांग जबी तेसके देखं तो, तबी तेस ढायारुड़ी तो नठ अंर चिंगाटुई करी तो बोलअअ कि, “तूँ परमेश्वर का बेटा अ।” ¹²अंर तेणे तिऊँक ऊकम देई करी बोलो की, “तुवें मेरे बारे मुंझ नु बोलीया की आऊँ कूण अ।”

ईसाएँ आपड़े बारअ खास आदमी छटे

¹³तबी ईसा एक टीराच निकड़ा अंर जिऊँक सो चावं ता तिऊँक तेणे आपु ढाई बोईदे, अंर सो तेस ढाई आए। ¹⁴तबी तेणे आपड़े सात रण के अरनीतेथु मुंझी बारअ मरदुक छटे अंर तिऊँक प्रेरीत अटाएँ कि जबी ईसा तिऊँक बेजला तबी सो परचार करदे बी जाले, ¹⁵अंर दुष्टांग खेराण का अक बी राखले। ¹⁶से बारअ एजेअ, शेमोन, जेसको नाव तेणे बाद मुंझ पतरस राखो, ¹⁷अंर जबीदी का बेटा याकुब, अंर याकुब का भाई यऊना, जेऊँको नाव तेणे बूनरगिस राखो जेतुका मतलब अ “गुड़नअ के बेटे,” ¹⁸अंर अन्द्रियास, अंर फिलिप्पुस, अंर बरतुमे, अंर मती, अंर थोमा, अंर अलफई का बेटा याकुब, अंर तदे, अंर शेमोन देस भक्त, ¹⁹अंर यऊदा इस्करोती, जेणे ईसाक बाद मुंझ दोखे से पकढाई बी देना।

ईसा अंर दुष्टांगु का स्याणा

²⁰तबी ईसा अंर तेसके चले दारके आए अंर इछे लोग कठे अई कि तिऊँके बिलाई खाणको बी ना खावण। ²¹जलाई तेसके भितर वाड़ी एजो सुणो, तलाई सो तेस पाकड़ंदे नठे काईकि तिऊँका माना ता की ईसा झाला अ। ²²सास्त्री बी जे यरुसलेमई ते रे आई सो ते बोलो कि, “ईसांदो दुष्टांग अ अंर यो दुष्टांगु के स्याणा बेलजाबुल के मदता लेई दुष्टांग खेराअं।” ²³तबी ईसाएँ तिऊँक आपु ढाई बोईदी करी, फारसियाऊँ पाण्डो बोलअदा लागा कि, “दुष्टांग कसो सकं दुष्टांगक खेराई ²⁴जे कोजेई मुलुकदी आपस मुंझ फूट पड़अ तबी सा मुलुक एक कसा सकं रई? ²⁵जेतु कबिले पुण्डी फूट पड़अ सा कबिला कठा सकीना रई ²⁶अंर जे दुष्टांग आपड़े राज्य के बिरोद आपुई करला तबी तिऊँ मुंझ फूट पड़दी अंर सो खतम नठदे

अई। ²⁷पर जे कुणीए कसीई जानदार आदमी के बितरे चोरी करला तबी पोईले तेसीक बांधना पड़दा, तबी सो चोरी सकं करी ²⁸आऊँ तूँ बेर साची-साची लाऊ, कि लोग जे पाप सो करअ अंर जेई बुरी बाता सो परमेश्वर के बिरोद मुंझ बोलअ सेई माफ अई सकं। ²⁹पर जे कुणीए सुच्चे आत्मा के बिरोद बुरी बाता करला त तेसके पाप कदी बी माफ ना अंदे, काईकी सो अमेसा, पापु का साती रंदा।” ³⁰ईसाएँ ऐजो ऐथु बजेसे बोलो कि किछ लोग ते बोलअअं कि, ‘ईसांदो दुष्टांग अ।’

ईसा की ईजी अंर बाईटुड़े

³¹तबी ईसा की ईजी अंर तेसके बाईटुड़े आए अंर भाण्डे खड़े अई करी तिवें ईसाक अटाणक आदमी बेजा। ³²जेई बीड़ तेस भारोड़ी ती बेठीये, तिवें ईसा बेर बोलो, “तेरी ईजी अंर तेरे बाईटुड़े भाण्डे ताऊँ मिलदे रे आई।” ³³तेणे तिऊँक जबाब देना, “मेरी ईजी अंर मेरे बाईटुड़े कूण अ?” ³⁴जे तेस भारोड़ी आदमी ते बेठीये तिऊँके बिला ऐरी करी तेणे बोलो, “मेरी ईजी अंर बाईटुड़े एजेंई अ।” ³⁵काईकी जे कुणीए परमेश्वर की बात मानअ सेजेई मेरी ईजी अंर भाई-भईण अ।”

बीज बोण वाड़े जिमदार की फारसी

4 ¹ईसा फेर झीलाके छेंव पुण्डा सिखांदा लागा, अंर तेस ढायाईछे आदमी कठे अए की तेसके नावींदो पड़ो बेठनं अंर सारी भीड़ छेंव पुण्डी रई। ²अंर सो तिऊँक फारसियांऊ पाण्डी भरी सी बाता सिखांदा लागा अंर सिखांदुई तेणे बोलो, ³“सुणो, एक जिमदार बीज बाँदा नठा। ⁴बाँदुई बेरा किछ बीज बाटांदो पड़ो अंर तेथुक चलखुड़ीएँ चुणी मारो। ⁵किछ साकरी मुंझ पड़ो जेके तेथुक मुकी माटी ना मिलन से, तिखड़ो जामो ⁶अंर जबी घाम लागा तबी सो असलाई नठो अंर जड़ीयाऊँक माटी ना मिलन के बजेसे सो सुकी नठो। ⁷अंर किछ बीज झालु मुंझ पड़ो अंर झालुएँ बड़ी करी तेथुक दबाई देनअ अंर तेथु पाण्डो नाज ना लागो। ⁸पर जेओ नखले डोखरे पुण्डो पड़ो सो जामो अंर बड़ी करी सील लागे कोजेई सील बितोड़ी तीस दाणे, कोजेई बितोड़ी साठ दाणे, अंर कोजेई बितोड़ी सो दाणे लागे।” ⁹तबी तेणे बोलो, “जेसके सुणनके कान अ सो सुणी करो।”

बीज बोण वाड़े जिमदार के फारसी का मतलब

¹⁰जबी भीड़ नठी गोई तबी तेसके सातकिएँ अंर चेलीएँ ईसा बेरी फारसियाऊँ के बारे मुंझ पुछो। ¹¹तेणे बोलो, “तुमु बेर त परमेश्वर के राज्य का बेद देईएँ अ, पर भार वाड़ीक सब बाता फारसियाऊँ मुंझ सुणाव। ¹²जेतु बजेसे, सो देखं त देखं पर पछाणीना अंर सुण त सुण पर समजीना, पर जे पछाणी अंर समजी गालले तबी सो आपड़ी गलती मानदे अंर परमेश्वर तिऊँक माफ करदा।”

¹³तबी ईसाएँ तिऊँक बोलो, “का तुमे एई फारसी समजीना? तबी ओर फारसीया कसी समझदे? ¹⁴जिमदार जेओ बोअं सा परमेश्वर का बचन अ। ¹⁵बाटांदी को बीज सेजो अ, जो आदमी परमेश्वर का बचन सुण अ, अंर दुष्टांग, तलाई आई करी, तिऊँके जियंदी परमेश्वर के बात धुर नेवं। ¹⁶साकरी मुंझ को बीज सेजो अ जो परमेश्वर के बाताक सुण अ अंर तलाई खुशी से मानअं। ¹⁷पर तिऊँ बितोड़ी गईरे बिस्वास की जड़ ना अण के बजेसे सो परमेश्वर के बाताच किछ दुस रअं अंर बाद मुंझ जबी तिऊँच परमेश्वर के बाता के बजेसे दुख सकंट अंर सतावं आवं तबी तिऊँका परमेश्वर के बाताची बिस्वास अटी नठ। ¹⁸झालु मुंझ को बीज सेजो अ, जो परमेश्वर के बात सुण, ¹⁹पर जबी तिऊँ बितोड़ी जिण की चिन्ता, अंर रुपिये-पईसी का लालच, ओर चिजाऊँ का लालच आवं, तबी सो परमेश्वर के बाताक दबाई देवं अंर तेसकी बात तिऊँ बितोड़ी काम ना करी। ²⁰नखले डोखरे पुण्डे को बीज सेजोअ जो परमेश्वर की बाता सुणअ अंर तेथुक मानअं अंर सो आच्छी फसल लेवं कोई तीस गुणी, कोई साट गुणी, अंर कोई सो गुणी लेवं।”

दिये की फारसी

²¹तबी ईसाएँ आपड़े चेलीक बोलो कि, “कुणीये दिया ऐथु अरनीओजाई ना कि बाण्डे थाले या चरपाया थाले राखले? पर एतु अरनीओजावं कि तेथुक दियोटच राखले। ²²जेई बी चीज चोरीएँ अं सेई ऊण्डी देखांदा, अंर जेई बी बात छुपाईएँ अं सेई सब सामणी आंदी। ²³जे कसी के सुणनके कान अ त सो सुणी करो।” ²⁴तबी ईसाएँ तिऊँक बोलो, “चोकस रया कि तुवें का सुण, जेसना बरताव

तुम ओके के सात करले तेसनाई बरताव परमेश्वर तारे सात बी करदा अंर तारे सात ओर सकोड़ा बरताव करदा। ²⁵पर जेस बेर अस अं तेसके ओर देंदे अंर जेस बेर आथी ना तेस बेरी जेओ किछ बी असअं सो उण्डो मांगदे।”

जामन वाड़े बीजकी फारसी

²⁶तबी ईसाएँ बोलो, “परमेश्वर का राज्य ऐसा अ जेसो कुणीएँ आदमी डोखरी पुण्डो बीज छीड़कअ ²⁷अंर रात दुस बितदे लागे, अंर तेसके पताई ना चली कि बीज कसो कोपाण अंर कसो जामो। ²⁸काईकी जमीन आपुई कोपे फुटावं, तबी बाल, तबी सील लागं अंर तबी सीलु बितोड़ी दाणे आवं। ²⁹अंर जबी नाज पाकी जावं तबी सो दातरे लेई लअं, काईकी फसल लण का बखत रा आई।”

राई के दाणे की फारसी

³⁰तबी ईसाएँ बोलो कि, “आमे परमेश्वर के राज्य कि तुलना कथु से करनी, अंर कथु फारसीया का उदारण देणा? ³¹सो राई^७ के दाणे जेसा अ, अंर बंदुई बेरा सारे बिजुं मुंझी सबसे नेन्द्रा अ। ³²अंर जबी सो बई करी जामं तबी सारे साग-पात मुंझी तेथुका बूट सबसे बड़ा अं, अंर तेथुकी साऊई ईछी बडी अं कि चलकुड़े तेथुके छाईला को बुटबो कोओ सकं भाणी।” ³³अंर तिऊं लोगुंक ईसा जीछो सो समझं ते तिछोई सो तिऊंक फारसीया देई-देई करी बचन सुणाव ता ³⁴अंर बिना फारसीया को सो तिऊंक किछ नु ता सिखाई पर ऐखुलीया जाई करी सो आपड़े खास चेलीक सारे फारसीयाऊं का मतलब बोली ता देवं।

ईसाएँ ढण्ड रोको

³⁵तदुसेई पाछाको ईसाएँ आपड़े चेलीक बोलो, “चालो आमे झीला के पाईले बिला जामे।” ³⁶अंर ईसा बीड़ाक छोड़ी करी जेसाई सो असं ता चेलीएँ तेसाई तेसके आपड़े सात नावींदा नेया अंर तिऊंके सात ओर बी नावी ती। ³⁷तबी खुबेई को ढण्ड भण अंर पाणी के अलियारे नवींदे ते लागीएँ आंदे अंर नांव बरुंदी ती लागीएँ। ³⁸अंर ईसा नावी के पछले सीटांदा सिराणीया लाई करी सुती ता रा अंर तबी तेसके ऊबा उजिया अंर बोलो, “ओले गुरजी, ताऊंखें फिकर आथीना कि आमे मरदे लागीएँ।” ³⁹तबी ईसाएँ उबे

^७ ईज्राएल देश मुंझ राई का बुट तीन मीटर का अं।

उजुई करी ढण्ड बुरजाओ अंर अलियारीक बोलो, “रुकी जा” अंर सब ढण्ड थाकी नठो। ⁴⁰ईसाएँ तिऊँक बोलो, “तुवें काई डरं का तुमुक फेर बी बिस्वास आथीना।” ⁴¹अंर सो भरी डरी नठे अंर आपस मुंझ बोलअदे लागे कि, “यो असं कूण अ” जो पाणी के अलियारे अंर ढण्ड बी ऐसकी बात मानअ।

ईसाएँ एक आदमी पाण्डी दुष्टांग खेराओ

5¹तबी ईसा अंर तेसके चेले झीला के पाईले बिला गिरासोनीयो के देशंदे पोऊँछे ²अंर जबी सो नावींदी उतरा तबी तलाई एक आदमी जेस पाण्डो दुष्टांग तो लागीएँ सो ईसा ढायाआ ³सो मर्थीयाच ता रवं अंर तेसके कुणीए बी आदमीएँ सांगणाऊ पाण्डा भादी ना सका। ⁴अंर जला-जला कुणीएँ तेसके आत गोडे सांगणाऊ लेई भादे तला-तला तेणे तेथुके तोड़ी करी रेण्डे-रेण्डे भाणे अंर तेसके कुणीएँ बी आपड़े बस मुंझ ना सका करी। ⁵सो रात दुस मर्थीयाऊँच अंर दाराऊँच ललीयावं ता अंर डुंगुरु लेयाँई आपड़े चोटां ता लावं।

⁶तेणे जबी दुरेई ईसाक देखा, तबी सो दोऊड़ि करी ईसा ढाई आ, अंर तेसके ढाल करी, ⁷अंर तेणे जोर से ललीयाई करी बोलो, “ओ परम परमेश्वरअ का बेटा ईसा मुंखे ताऊँसे का काम अ? आऊँ ताऊँखे परमेश्वर कि कसम देऊँ कि तूँ मुंखे दुख नु देया।” (⁸काईकी ईसाएँ बोलो तो कि, “ऐस आदमी बितोड़ी तूँवें दुष्टांगो धुर नठो।”) ⁹ईसाएँ, तेथु दुष्टांगु बेरी पुछो कि “तेरो नांव का अं?” दुष्टांगुएँ ईसाक जबाब देना, “आमारो नांव सेना अ काईकी आमे भरी अ” ¹⁰अंर दुष्टांगुई ईसा से भरी विनती करी कि “आमुक एतु मुलकंदी धुर नु बेजया।”

¹¹तेकी धाराच सुंगरु की एक बड़ी टोली ती लागीएँ चरदी। ¹²तिऊँ दुष्टांगुवें ईसा से विनती करी कि “आमुक इऊँ सुंगुरु बितोड़ी दे बेजी।” ¹³तबी ईसाएँ तिऊँक ऊकम देना कि, “जाओ।” सारे दुष्टांग तेस आदमींदी धुर नठी करी सुंगरु बितोड़ी बेठे अंर सुंगरु कि टोली जेई किछ दुई अजार की ती सेई दोऊड़ी करी धारा के छेंव पुण्डी रुड़ी करी झीलांदे पड़े अंर डूबी करी मरी नठे।

¹⁴सुंगुरु चारनु वाड़ीएँ दोऊड़ी करी एई बात गावंदी सुणाई अंर जेई बात तिऊँके सात गटी ती तेथु एरदे लोग आए। ¹⁵लोगुएँ आई करी देखो की जेस आदमींदी दुष्टांगु कि सेना ती समाइएँ सो ईसा

ढाई गटुण बीड़ि करी चुपचाप ता बेठीएँ अंर एतु बाताक देखी करी लोग डरी नठे। ¹⁶देखन वाड़ीएँ, जेस आदमीदो दुष्टांग तो, तेसकी बात अंर सुंगरु की सारी बात ओरु लोगुंक बी सुणाई। ¹⁷तबी लोगुएँ ईसाक आतुं जोड़ि करी बोलो कि, “अमारे मुलकंदी दुर जा।” ¹⁸जबी ईसा जाण के अरनीनाविंदा बेठदा लागा तबी, जेसदो दुष्टांग तो, तेणे बोलो कि, “मुंखे बी आपड़े सात ने।” ¹⁹पर ईसाएँ तेसके आपड़े सात देना ना आणई, अंर तेसीक बोलो कि, “आपड़े गरे जा” अंर आपड़े लोगुंक बोलअ कि, “प्रभुई ताऊंच कुछी दया करी अंर तेरे अरनीकुछा बड़ा काम करा।” ²⁰सो दिकापुलिस^० नठा अंर तेणे बोलो कि, “ईसा मेरे अरनीकुछा बड़ा काम करा” अंर सारे लोग तेसकी बात सुणी करी चचकुई रएँ।

मरीएँ छोरी अंर बिमार बेटकुड़ी

²¹जबी ईसा नावींदा पाईले बिला नठा तबी एक बड़ी बीड़ तेस ढायाकठी अई, अंर सो झीला के छेवं पुण्डा ता ²²तबी दियाण्डे के स्याणाऊं मुंझी एक याईर नावं का आदमी ईसा ढायाआ अंर तेसके देखी करी गोडी मुंझ रुड़ा। ²³अंर आतु जोड़ी करी बोलअदा लागा कि, “मेरी नान्द्री छोउटी मरनं वाड़ी अ। तूँ मेरे सात आई करी तियाँके मुण्डीयाच आत राख कि सो ठीक अई करी जिऊन्दी रली।” ²⁴सो तेसके सात नठा अंर ईछी भीड़ ईसा पछीण्डी आई, कि लोग तेसीच ते लागिऐं पड़दे।

²⁵तेवड़ी एक बेटकुड़ी ती तियाँक बारं साल से लोई बणं की बिमारी ती। ²⁶तियाँएँ भरी बेटुं बेरी आपड़ा ईलाज कराआ पर कणीक बी आराम ना मिला, तियाँ बेर जेएँ बी रुपीयें पईसे ते सब कुछ लाणं के बाद बी तियाँक आराम ना मिला अंर लोई ओरोड़ लागो बंदो। ²⁷तियाँईं जबी ईसा के बारे मुंझ सुणं तबी सो बीड़ा मुंझ नठी अंर पछले बिलाई ईसा के गटूण छुरे। ²⁸सो आपड़े जीयंदो ती सुचं कि जे आऊँ ईसा के गटूणेईं सकंमा छुई त आऊँ ठीक जांदी अई। ²⁹अंर तलाई तियाँको लोई बणं रुकी नठो अंर तियाँईं जाणी पाओ कि आऊँ ठीक गोई अई। ³⁰ईसाक जलाई पता चला कि मू बितोड़ी किछ सकती निकड़ी, तेणे तलाई पछीण्डे मूड़ि करी पुछो कि, “मेरे गटूण कुणे छुरे?” ³¹तेसके चेलीयें बोलो कि, “तु ऐजो देखी नी पाएँ, कि बीड़ ताऊंच लागीऐं पड़दी? अंर तूँ बोले

^० दिकापुलिस दस शईरु का एक मुलुक ता

कि मुंखे कुणे छुआ।” 32तबी तेणे बीड़ा मुंझ आण्डो पाण्डो ऐरो, कि ऐसो कुणे करो। 33जलाई तियाँक पता लागा कि आऊँ ठीक गोई अई तलाई सो डरि करी कामणुन्दी लागी अंर ईसा के गोडी मुंझ रूडी अंर तियाँई तेस बेर साचि साचि देनी लाई। 34ईसाएँ तियाँक बोलो, “बेटियें ताऊँखेतेरे बिस्वासई ठीक देनि भाणी, ऐबें खुशी से जा, अंर तूँ ठीक गोई अई।”

35जलाई ईसा तियाँ बेटकुड़ियाँक बोलअदा ता लागीयें तलाई दियाण्डे के स्याणा, यार्इरअ, के दारकेई आदमी आए अंर तिवें बोलो कि, “तेरी बेटा मरी गोई एबे गुरजीक काई परशानी दे।” 36जेई बाता तिऊँवें बोली ती लेई तेथुक ईसाएँ अणसुणी करी अंर दियाण्डे के स्याणेक बोलो, “डरीयानु बस बिस्वास राखा।” 37तबी तेणे सबूक छोड़ी करी पतरस, याकुब, अंर याकुब के भाई यऊनाक साते ने अंर ओरुक कसीक बी आपड़े सात आणई ना देने। 38जबी सो दियाण्डे के स्याणे के दारके पोऊछे तबी तेणे लोगुंक रूंदुई अंर ललीयांदुई देखे। 39तबी ईसाएँ बितरे जाई करी जे लोग रूंदे ललीयांदे ते लागीएँ तिऊँक बोलो “तुवें काई रुअं अंर काई ललीयावं, छोऊटी मरीये आथीना सो सुती रोई।” 40पर लोग ईसा के ठाटे लागे करदे, अंर तेणे सबूक भाण्डे बेजी करी छोरीयाके ईजी, बाबा अंर आपड़े सातकीक ने अंर जेवड़ि छोरी ती सुताईएँ तेवड़े नठे। 41अंर ईसाएँ छोरीयांका आत पाकड़ी करी बोलो, “तलीता कूमी” जेथुका मतलब अ, “ओ छोरीए आऊँ ताऊँखे बोलु कि उबी उजुऊ।” 42छोऊटी झट-पट ऊबी उजुणी अंर उण्डी-पुण्डी आण्डदी लागी, सो बारअ साल की ती। लोग यो देखी करी चचकुई रएँ। 43ईसाएँ तिऊँक ऊकम देई करी बोलो कि, “ऐथु बाता का पता कसकेई बी लागा ना चाएँ।” तबी तेणे तिऊँक बोलो, “याँ छोरीयाक किछ खाणक देओ देई।”

ईसा को आपड़े गांवे जाण

61तबी ईसा तेकीई आपड़े गावंदा आ, अंर तेसके चले बी तेसके सात ते। 2अंर बेठोज के दुस सो दियाण्डे पुण्डा नठा अंर शिखांदा लागा, अंर सारे लोग तेसकी बाता सुणी करी ताजुब रे अई अंर बोलअदे लागे कि, “ऐई का बात अ? ऐसके कुछी बुद्धी देईएँ? अंर ऐसके आतु लेई कसने चमतकार अं? 3का यो सेजाई बाडोई आना, जा मरियम का बेटा अं अंर याकुब, योसेस, यऊदा, अंर शेमोन का भाई अ? का ऐसकी बईणी आमारे सात रईना?” अंर

ऐथु अरनीलोगुकेजियंदी ईसा के बजे से ठेस पोऊँछी।⁴ईसाएँ तिऊँक बोलो, “परमेश्वर के बांकी का आपड़े मुलकंदा, अंर आपड़े बितरे अंर आपड़े गावं छोड़ी करी ओरते कोकीई बी तेसकी बेजती ना करी।”⁵तेणे किछ बिमारुच आत राखी करी ठीक करनअ के अलावा तेवड़े ओर किछ बी चमतकार करी ना सके।⁶ईसा तिऊँके कम बिस्वास देखी करी ताजुब रा अई अंर तबी सो तियाँऊण्ड के सारे गावंदा परचार करदा लागा।

बारं चेलीक बेजने

⁷तेणे आपड़े बारूँ चेलिक आपु ढाई बोईदे अंर तिऊँक दुइदुई करके बेजे अंर तिऊँक दुष्टांगु खेराण का बी अक देना।⁸तेणे तिऊँक ऊकम देना कि, “बाटा के अरनीलाठे के अलावा ओर किछ नु नेया, ना कोदुऐ, ना जोड़ा, ना बटुवेंदे पईसे।⁹पर चापल बिडीया अंर बदलण के अरनीओके गटुण नु नेया।¹⁰जेथु बितरं पुण्डे तुम जाले तेथु पुण्डे ता दुरी रया जा लुगी तुवें तेथु सईरंदे रले।¹¹जेकी कोकीई तुवें जाले अंर तेकीयाके लोग तारी बात नु सुणले अंर तुमारा स्वागत नु करले तबी तुमे तेथु गावंदी पछी आंदुई बेरा आपड़े गोडी की दूइ जाड़ी करीया[†] की तिऊँके खिलाफ चेताऊनी अंदी।”¹²तबी तिऊँई जाई करी परचार करा कि जिंऊ बोऊड़ाओ।¹³अंर तिऊँई भरी दुष्टांगुक खेराए अंर भरी बिमारु पाण्डो तेल लाई करी तिवें ठीक भाणे।

यऊना नाईण देण वाड़े की अतिया

¹⁴राजा ऐरोदेसई बी ईसा के नावं कि चरचा सुणी, काईकी तेसको नाव भरी तो रो फईली। अंर लोग बोलअ ते कि यऊना नाईण देण वाड़ा, पछी मरी करी जिऊँदा रा गोई, ऐथु अरनीऐई सक्तियाँ तेसदी काम करअं।¹⁵किछ आदमी ते बोलअ, कि यो ऐलिया अ। पर किछ लोगुएँ बोलो कि, “यो पोईलके बांकीयूँ मुंझी एक अ।”¹⁶जबी ऐरोदेसई यो सुणो, तबी तेणे बोलो, “यऊना नाईण देण वाड़ा जेसकी मुण्डी में कटाई ती सो बी मरी करी पछी जिऊँदा रा गोई।”¹⁷ऐरोदेसई आपड़े भाई फिलिप्पुस की जोरुवा ऐरुदिया के बजे से सिपाई बेजी करी यऊनाक पकडु वाअ अंर चुंगा दे जेला

[†] दूइ जाइन का मतलब ऐजा अ कि जेसके खिलाफ चेलीएँ दूइ जाइ तेससे तिऊँका कोई सम्बन्ध ना आथी।

पुण्डा गटी, काईकी ऐरोदेसएँ तियाँसे जोजोड़ा ता राखा भाणी^७,
¹⁸अंर यऊनाए ऐरोदेसक बोलो कि, “ताऊखे आपड़े भाई की जोरुवाक राखनी ठीक ना आथी।” ¹⁹ऐथु बजेसे ऐरुदिया तेससे आंटी राखं, अंर सो ऐजो ती सुचं कि ऐसके मरबाई देवं, पर सो कामीयाब ना अई, ²⁰काईकी राजा ऐरोदेस यऊनाक सुचा अंर साचा आदमी जाणी करी तेसके डरं ता, अंर ऐथु अरनीतेसके बचाई ता राखं, तेसकी यऊना कि बात सुणी करी तेसको पेट को पाणी बी ठण्डो तो नठो अई, पर यऊना की बाता सुणनी तेसके आछी ती लागअं। ²¹एक दुस ऐरुदियाक ठीक बकत मिला जबी राजा ऐरोदेसएँ आपड़े पईदा अण को दुस मनाओ, तेणे प्रधानुक, सेनापतीयूँक अंर गलील के बड़े लोगूँक दावत मुंझ बोईदे। ²²तबी ऐरुदिया की बेटी राजा के दरबारन्दी आई अंर नाची करी राजाक अंर जिछे बी पावणे बेठीए ते सबूँक खुस करे। तबी राजा ऐरोदेसई खुस अई करी, छोऊँटीयाक बोलो, “जेओ किछ ताऊँखे चाईअ सो मांग, आऊँ ताऊँखे देंदा अ” ²³तेणे कसम खाई करी बोलो कि, “जे तु मेरा आद्धा राजपाट बी मांगली त सा बी आऊँ ताऊँखे देंदा अ।” ²⁴तियाँई भाण्डे आई करी आपड़े ईजा बेरी पुछो कि, “में का मांगनअ?” तियाँके ईजाई बोलो, “यऊना नाईण देण वाड़े की मुण्डी मांग।” ²⁵सो दोऊड़ी करी पछी बितरे नठी अंर तियाँएँ बोलो कि, “तूँ मुंखे ऐबी यऊना नाईण देण वाड़े की मुण्डी एक थाड़ियांदि दे मगाई।” ²⁶तबी राजा बेजाई दुखी अवा, पर आपड़े कसम अंर पावणी के बजेसे तियाँक मना ना सको करी। ²⁷तबी राजाई सिपाईक ऊकम देना कि, “यऊना की मुण्डी काटी लेया” ²⁸तबी सिपाई जेला पुण्डा नठा अंर यऊना कि मुण्डी एक थाड़ियांदि काटी करी लेई अंर तियाँ छोरीयाक देनी देई अंर छोरीयाई आपड़े ईजाक देनी। ²⁹जबी यऊना के चेलीक ऐथु बाता का पता लागा तबी तिऊँवे तेसकी लास चुंगी अंर एक कबरांदी देनी दरी।

चेली को पछी आणं

³⁰तबी चले ईसा ढाई कठे अवे अंर जेओ किछ तिऊँवे शिखाओ अंर करो तो सो सब ईसा बेर बोलो। ³¹तबी ईसाएँ तिऊँक बोलो कि, “कोकीई सुन-सान जागाच पईज गाइदे चालो” काईकी भरीसे

७ यऊदी लोगु का रिती रिवाज ऐसा ता कि जा लुगी बाई जिऊँदा अ ता लुगी ओके बाई तेसके जोरुवा के सात जोजोड़ा सकी नु ते भाणी।

आदमी तिऊँ ढायाआन्दे-जान्दे ते रंअ लागी अंर तिऊँक खाणँ खाण का बी बखत नु ता मिली। ³²अंर सो नावींदे बेठी करी सुन-सान जागाच नठे।

पाँच अजार मरदुक खाणँको खियाण

³³लोगुएँ तिऊँक जांदुई देखे अंर पछाणी गाले अंर भरीसे सईरूंदी लोग दोऊड़ी करी तिऊँसे पोईले तेथु जागाच पोऊछे। ³⁴ईसाएँ नावींदी ऊतरी करी भरीसे आदमीक देखें अंर तेसके तिऊँच दया आई काईकी सो बिना बेड़ा वें जेसी बेड़ा ,तँभर सो तिऊँक भरीसी बाता शिखांदा लागा। ³⁵जबी पाछा का बखत अवा तबी ईसा के चेलीएँ तेस ढायाआई करी बोलो, “ऐई सुन-सान जागा अ अंर दुस बी डूबी गो। ³⁶ईऊँक जाणई दे कि यो गावंदे अंर बजारंदे जाई करी अपड़े अरनी खाणं पीणं का इंतजाम करले।” ³⁷ईसाएँ चेलीक बोलो, “ईऊँक खाणको तुमे कि ना खबाई?” तबी तेसके चेलीएँ बोलो कि, “आमे दुई सो दिनार^f के कोदुवे मोले लेई करी ईऊँक खियाँणे?” ³⁸ईसाएँ तिऊँक बोलो, “जाई करी ऐरो कि तुमु बेर कुछोड़े कोदुवे अ?” तिऊँई पता करी-करी बोलो “पाँच कोदुवे अंर दुई माच्छे अ।” ³⁹तबी तेणे बोलो कि, “सबुक धईनी लुंगा लाई करी गासच खाणँ खाणक देओ बेठाई।” ⁴⁰सो एक-एक लुंगांदे सो-सो पचास-पचास आदमी बेठे। ⁴¹ईसाएँ से पाँच कोदुवे अंर दुई माच्छे आतंदे चुंगे अंर गईणी बो ऐरी करी परमेश्वर बेरी बरगत मांगी, अंर से कोदुवे तोड़ी करी अंर माच्छे चेलीक देंदा रा लागी अंर तिवें लोगुंक देने। ⁴²अंर सारे लोग खाई करी अगाई नठे, ⁴³तबी तिऊँवें बचीये कोदुवे अंर माच्छी की बारंअ छटीया कठी करी। ⁴⁴खाणँ-खाण वाड़ी मुंझ पाँच अजार मरंद ते।

ईसा को पाणीच आण्डन

⁴⁵ईसाएँ आपु से पोईले बेतसेदा पोछनं के अरनीचेलीक झीला पाईले बीला जाणके अरनीनावींदे देने बेठाई अंर आपु लोगुंक बिदा करदा लागा। ⁴⁶लोगुंक बिदा करनअ के बाद सो दाराच पराथना करदा नठा। ⁴⁷अंर जबी ईन्यारो पड़ी गो तबी नावं झीला के बिचंदी ती अंर ईसा जमीनाच ऐखुलिया खड़ा ता। ⁴⁸जबी तेणे देखो कि तिऊँक नाव चलांदुई बितदी रोई लागी काईकी बात ऊलटो तो रो

^f एक दिनार की कीमत करीब एक दुस कि धियाड़ी।

भंदो लागीं। तबी रातीयेंई अण से पोईले सो पाणीच आण्डी करी तिऊँ ढायाक नठा अंर सो तिऊँ से आगीण्डो ता सुचं जाण, ⁴⁹चेली ईसाक दुरेई पाणीच आण्डदुई देखी करी सुचों की बूत अ अंर सो ललीयांदे लागे। ⁵⁰काईकी सो तेसीक देखी करी डरी रे, तबी तेणे तलाई बोलो कि, “डरीयानु आऊँ अं।” ⁵¹अंर जबी सो तिऊँके सात नावींदा बेठा तबी बात रुकी नठो अंर तिऊँक सूचं बेठी। ⁵²अंर सो कोदुई के चमतकार के बारे मुंझ समजे ना काईकी तिऊँका दिमाक तला काम नु ता करी।

गन्नेसरत के बिमारुक आच्छे बाणने

⁵³जबी सो पाईले बिला गनेसर पोऊँछे तबी तिऊँवे नावं छेव पुण्डी देनी लाई। ⁵⁴लोगुएँ ईसाक नावींदी उतरंदुई पछाणी करी ⁵⁵ऊण्डे पुण्डे के सारे मुलकंदी दोऊड़ी करी जेकीई एसो सुणो कि ईसा तेकीअ लोगुएँ चरपायाच बिमारुक चुंगी करी तेकीने। ⁵⁶ईसा जेकी बी जावं ता सारे गांव, बसती, सईरु के लोग बिमारुक लेई करी बजारंदे ते राखं अंर तेसके आतु जोड़ी करी ते बोलो कि, “तु आपड़े गटुणु का कुणाई दे छुणई।” अंर जीछे लोगुएँ तेसके गटुण छुए सो सब ठीक गोए।

रिती-रिवाज माननं का सवाल

7¹किछ सास्त्री अंर फरीसी यरुसलेमई आये अंर ईसा ढाई कठे अए। ²तबी तिऊँई तेसके चेली बिष्टुई, मतलब आपड़े रिती-रिवाज के जेसे आत ना धोईए खाण खांदुई देखें। ³(काईकी यऊदी अंर तिऊँ मुंझ के फरीसी लोगुका रिती रिवाज ऐसा ता कि जा दुरी सो आत नु पाले धोई ता दुरी सो किछ ना खाई ⁴अंर बजारेई आई करी जा दुरी नाऊई नु जाले ता दुरी सो किछ ना खाई तिऊँकी ऐसनीई भरीसी परथा जेतुक सो मानअं ते जेसे कटोरे, लोटे अंर तांबे के भाण्डे धोणे अंर मांजने।) ⁵तबी फरीसी अंर सास्त्रीयूँई ईसा बेरी पुछो कि, “तेरे चले बाठ-बाठी के भाणीये रिती रिवाजक काई ना मानी? यो खाण-खाणं के अरनीआपड़े आत आमारे रिवाज के जेसे काई ना धोई?” ⁶तबी ईसाएँ बोलो, “यशाया बाकीएँ तुमु कपटि लोगु के अरनीठीक भविष्यबाणी ती करी, एसो लिखीएँ अ कि, ‘यो मुअं लेई तेरी ईजत करदे पर ईऊँके जिऊ ताऊसे दुर रंदो।’ ⁷यो बेकार मुंझ मेरी पराथना करं काईकी यो आपड़े भाणीएँ नियम

परमेश्वर के भाणीएँ नियम के रूप मुंझ लोगुंक सिखांवा।⁸काईकी तुम परमेश्वर की ऊकम टाड़ी करी आपड़े रिती-रिवाज मानअं।”
⁹तेणे तिऊँक बोलो, “तुवें आपड़े रिती-रिवाज माननं के अरनीपरमेश्वर की ऊकम कसा देवं टाड़ी? ¹⁰काईकी मुसाएँ बोलो कि, ‘आपड़े ईजी बाबा की ईजत करीयां अंर जो कुणीए आपड़े ईजी बाबाऊँक बुरो बोलअला तेसके मारी गेरीआ,’ ¹¹पर तुम बोलअअ कि, ‘जे कुणीएई आपड़े ईजा बाबाक बोलअले कि जा किछ तुमुख मूँ लेई जा फाईदा मिलंअ सा “कुर्बान अ” जेथु का मतलब परमेश्वरक बेंट चढाईएँ।’ ¹²तबी तुम तेसके आपड़े ईजी बाबा कि कोई बी सेवा ना देई करनअई ¹³अंर ऐसेई तुम आपड़े रिती-रिवाज के अरनीपरमेश्वर का बचन टाड़ी देवं अंर ओर बी ऐसने बरीसे काम करअं।”

आदमीक बिष्टाई देणं वाड़ी बाता

¹⁴ईसाएँ लोगुंक आपु ढाई बोईदी करी बोलो, “तुवें मेरी बाता सुणो अंर समझो ¹⁵जेई चीज आदमी बितोड़ी जावं तेथु लेयाई सो बिष्टुई ना, पर जेई बात जीयन्दी भाण्डी आवं तेथु लेयाई आदमी बिष्टूअं। ¹⁶(जे कसी के सुणनं के कानअ त सो सुणी करे।)”
¹⁷अंर जबी सो बीड़ाक छोड़ी करी बितरें लागा जांदा तबी तेसके चेलीएँ फारसीया के बारे मुंझ तेस बेरी पुछो। ¹⁸तेणे बोलो कि, “का तुवें समझी ना? जेओ किछ आदमी खावं तेथु लेयाई सो बिष्टुई ना। ¹⁹काईकी सेओ तेसके जियंदो जाईना पर गेरींदो जावं अंर सो तेथुक अगी देवं।” ऐसो बोली करी तेणे खाणं की सारी चिजाऊँक सुची ठइराई। ²⁰अंर बोलो, “जेओ आदमी के जीयंदी भाण्डो आवं सेजोई आदमीक बिष्टूअं। ²¹काईकी आदमी बितोड़ी बुरे विचार, अनेतिक योन सम्बंद, चोरी, जान से मारना, ओके के बेटकुड़िया के सात जाणं, ²²लोब, बुराई, कपट, बैजाईमीजि, जलन, निन्दा, गमण्ड, अंर बेवकुबी आवं। ²³ऐई सारी बुरी बाता आदमी के जीयंदी बाण्डी आवं अंर आदमीक बिष्टूअं।”

एक बेटकुड़िया का बिस्वास

²⁴ईसा सूर के मुलुकंदा जाई करी एक बितरासा नठा अंर सो चाई नु ता कि कसकेई बी मेरे बारे मुंझ पता चलं पर सो चोरुई

⁹ यूनानी भासा के किछ पुराणे ग्रंथु पाण्डो 16 पद मिलीना।

ना सका। ²⁵ईसा के बारे मुंझ सुणी करी एक बेटकुड़ी आई अंर सो तेसके गोडी मुंझ रुड़ी काईकी तियाँके बेटीया पाण्डो दुष्टांग तो रो लागी। ²⁶सो यूनानी ती अंर सीरिया के फिनीकीया जागाच पईदा अई। तियाँएँ ईसाक आतु जोड़ि करी बोलो कि, “मेरे बेटीयांदो दुष्टांग अ एथुक दूर दे खेराई।” ²⁷ईसाएँ तियाँक बोलो कि, “पोईले लाइकटीक दे अगाणी काईकी लाइकटी के कोदुए कुकरू के आगीण्डे फेरकाणे ठीक ना आथी।” ²⁸तियाँई जबाब देना, “प्रभु साची अ पर कुकुर बी त लाइकटी के जुठे टुकड़े नी खावं?” ²⁹तबी ईसाएँ बोलो कि, “तेरे ऐथु आछे जबाब देणं के बजेसे तेरे बेटीयांदी दुष्टांग नठी गो अंर तूँ गरे जा।” ³⁰तियाँई दारके आई करी देखो कि बेटीयांदी दुष्टांग नठी रो अंर सो सातरंदी सुतीएँ।

झाईरे अंर गुंगेक आछा भाणना

³¹तबी ईसा सूर से निकड़ी करी सिदोन अंर दिकापुलिस नगरु बाठु गलील झीलाच पोऊँछा। ³²तेकी लोगुएँ एक आदमीक लेया, जा लाण्डा अंर जाईरा ता अंर तिवें ईसाक आतु जोड़ी करी बोलो कि, “आपड़ा आत ऐसीच दरा।” ³³ईसाएँ तेसके बीड़ा मुंझी अलग नेई करी तेसके कानु पुण्डी आपड़ी गुठीया गेरी अंर आपड़े आतंदो थूकोअ अंर तेसकी जीब छुई। ³⁴अंर गईणीबो ऐरी करी घईरा सास मारा अंर तेसके बोलो “इफता” जेतुका मतलबअ “खुली जा।” ³⁵अंर सो कानु लेई सुणदा लागा अंर जिबा की गठण खुली करी आच्छे से बोलअदा लागा। ³⁶तबी ईसाएँ तिऊँक ऊकम देना कि, “कसी बेर किछ नु बोलीया।” पर जिछोईं तिऊँक तेणे बोलअनक मना करो सो तिछाईं जादा परचार करदे लागे। ³⁷अंर सारे लोग ताजुब रे मानी अंर बोलअदे लागे कि, “तेणे जेओ बी किछ करो सो आछो करो, सो झाईरीक सुणनकी अंर गुंगीक बोलअनं कि बी तागत देवं।”

ईसा चार अजार लोगुंक खाणको खियाण

8¹तला के दुस मुंझ फेर एक बड़ी बीड़ ईसा ढाई कठी अई अंर तिऊँ बेर किछ बी खाणक नु तो आथी तबी ईसाएँ आपड़े चेलीक आपु ढायाबोईदी करी बोलो कि, “मुंखे एतु बीड़ाच दया आवं काईकी यो तीन दुस से मेरे सात अ अंर यूँ बेर खाणक किछ बी ना आती।” ³जे आऊँ ईयूँक बुकाईं गरे देमा बेजी तबी यो बाटा बुका के मारे सिदाई करी रुडी सकं, काईकी यूँ मुंझी किछ दुरे के

बी आ।”⁴ तेसके चेलीएँ जबाब देना, “ऐथु सुनसान जागाच ईछे कोदुए कोकिई लेणे कि आमे ईयूँक खियाई सकंमे?”⁵ ईसाएँ आपड़े चेली बेरी पुछो कि, “तुमु बेर कुछोड़े कोदुए अ?” तिऊँवें जबाब देना कि, “सात कोदुए अ।”⁶ तबी तेणे लोगुंक निंगले बठनक बोलो अंर सेजे सात कोदुए आतंदे चुंगी करी परमेश्वर बेरी बरगत मांगी अंर तोड़ी करी आपड़े चेलीक देने की सो लोगुंक देले अंर चेलीएँ समेरी करी लोगुंक देनी।⁷ तिऊँ बेर किछ बारीक-बारीक माच्छे ते तेणे तेथुच बी बरगत मांगी अंर तेथुक बी लोगुंक देणक बोलो।⁸ जबी सबीयाँएँ खाई करी अगाई गोए, तबी चेलीएँ बचीएँ टुकड़ी की सात छटीया बरी।⁹ अंर खाण खाणंवाड़े चार अजार लोग ते। तबी तेणे तिऊँक बिदा करे।¹⁰ अंर ईसा आपड़े चेली के सात नवींदा बेठी करी दलनुता मुलुकक नठा।

परमेश्वर का चिन मांगना

¹¹ तबी फरीसीएँ आई करी ईसा से बोलअ चाल करी अंर ईसाक परेखणं के अरनीतेस बेरी पुछो कि, “जे ताऊँखे परमेश्वरई राखा बेजी त तूँ आमूक स्वरग का चिन देखा।”¹² तबी तेणे आपड़े जीयंदा घईरा सांस मारी करी बोलो कि, “ऐला के लोग चिन काई मांगअ? पर आऊँ तुमु बेर साची लाऊँ कि ऐला के आदमीक किछ बी चिन ना मिलदा।”¹³ अंर सो तिऊँ छोड़ी करी नवींदा पाईले बिला नठा।

यऊदी नेताऊ अंर ऐरोदेस के बिरुध मुंझ ईसा की चेतावनी

¹⁴ चेली बेर नवींदा एकवें असका ता अंर सो ओर लेजाणे बिसरी नठे।¹⁵ ईसाएँ तिऊँक खबरदार करे अंर बोलो कि, “ऐरोदेस अंर फरीसियूँ के खमीरं^h लेई चोकस रया।”¹⁶ सो आपस मुंझ बोलअ चाल ते लागीएँ करदे कि आमु बेर असके त आथीना।¹⁷ ईसाएँ यो जाणी करी तिऊँक बोलो कि, “तुमे आपस मुंझ यो काई सोचंअ की आमु बेर असके त आथी ना, का तुवें एबी लग समजीना की जाणीना? का तुमारा दिमाग काम ना करी? ¹⁸ का तुमुक एबी लुगी याद आना? या कानु लेई सुणीना? या आखी लेई देखीना? ¹⁹ जला में पांच अजार आदमी के अरनीपांच कोदुएँ तोड़े तला तुवें बचीए टुकड़ी कि कती छटीया चुंगी?” तिऊँई बोलो,

^h यऊदी लोग सोडेक खमीर ते बोलअं जेथु लेयाई असके फल।

“बारअ चुंगी।” ²⁰“अंर जबी चार अजार के अरनीसात कोदुऐ तोड़े तला बचीऐं टुकड़ी की कती छटीया चुंगी?” तिऊँई बोलो, “सात चुंगी।” ²¹तबी तेणे तिऊँक बोलो, “का तुवें एबी लुगी बी समजे ना?”

बेतसेदा के आन्देक आच्छा बाणना

²²तबी सो बेतसेदा आए अंर लोगुऐं एक आन्देक ईसा ढाई लेया अंर आतु जोड़ी करी बोलो कि, “ऐसके छुऊ,” ²³ईसाऐं तेस आन्दे का आत पाकड़ी करी तेसके गावंदी भाण्डा लेजा अंर तेसके आखींदो थुकी करी तेसीच आपड़ा आत दरी करी पुछो, “का तु किछ देखेंअ?” ²⁴तेणे आखीं खोली करी बोलो, “आऊँ आदमीक बुट के जेसा आण्डदुई देखी गालुं।” ²⁵तबी तेणे दुजाई तेसके आखींच आत दरा अंर तबी आन्देई आपणे आखे ढंग से खोले अंर सब आछे से देखाऊँदो लागो। ²⁶तबी ईसाऐं तेसके ऐसे बोलो कि, “आपणे गरे जा अंर ऐथु गावंदा ऐबी पछी नु जाया।”

ईसा कुण अ

²⁷ईसा अंर तेसके चले कैसरिया फिलिप्पी के गावंदे नठे अंर बाटा ईसाऐं आपड़े चेली बेरी पुछो कि, “लोग मुंखे का बोलअ कि, आऊँ कुण अ?” ²⁸तिऊँवें बोलो, “कुणीऐं ताऊँखे यऊना नाईण देण वाड़ा बोलअ, अंर किछ ताऊँखे एलिया बाकी बोलअ, अंर कोई ऐसो बोलअ कि तूँ बाकी मुंझी एक अ।” ²⁹तेणे तिऊँ बेरी पुछो, “तुवें मुंखे का बोलअअं कि आऊँ कुण अं?” पतरसऐं जबाब देना “तु मसी अ।” ³⁰तबी तेणे तिऊँक बोलो कि, “मेरे बारे मुंझ ऐई बात कसी बेर नु बोलीया।”

आपड़े मरनं के बारे मुंझ बोलअनं

³¹तबी ईसाऐं आपड़े चेलीक बोलो कि, “आदमीके बेटेच भरी दुख आंदे अंर यऊदी बाठ-बाठे, बड़े पुजारी, अंर सास्त्री तेसका ईनकार करदे। सो मरबाई जांदा अंर तीजे दुस पछी जिऊँदा जांदा।” ³²तेणे ऐई बात साफ-साफ बोली, ऐथुच पतरसऐं तेसके अलग नेई करी बुरजांदा लागो। ³³ईसाऐं पछीई मुड़ी करी चेली के बिला ऐरो अंर पतरसकं बोलो, “ओ शेतान मेरे सामणी दुर नठ, काईकी तूँ परमेश्वर की बातु पाण्डा ना पर आदमीके बातु पाण्डो आपड़ो जीऊँ लाऐं।”

ईसा पछ आण्डन का मतलब

³⁴तेणे बीड़ाक अंर चेली सुदे आपु ढायाबोईदे अंर बोलो “जा कुणीएँ मुँ पछीण्डो आण चावं, त सो आपड़ा इनकार करला अंर आपड़ो कुरुसं आपुई चुंगी करी मुँ पंछीण्डा आला ³⁵काईकी जा कुणीएँ आपड़ी जान बचाणी सुचला सो तेथुक खौंदा अ, पर जे कुणीएँ मेरे अंर आछे खबरा के अरनीआपड़ी जान देला त सो तेथुक बचांदा अ। ³⁶जे आदमीक सारी दुनिया जाली मिली अंर आपड़ी जान देला खोई तबी तेसके का फाईदा अं? ³⁷आदमी आपड़े जाना के बदली को का देंदा? ³⁸जे कुणीएँ ऐथु कुकरमी अंर पापी पीड़ियांदा मुँ से अंर मेरे बचन लेई सरमाला। जबी आदमी का बेटा अपड़े स्वरगदुत के सात अंर आपड़े बाबा की मईमा के सात आला तबी तेसके पछाणनक आऊँ बी सरमांदा अ।”

9¹तबी तेणे तिऊँक बोलो कि, “आऊँ तुम बेर साची लाऊँ, कि जे आदमी ऐवड़े खड़े अ ईऊँ मुंझी किछ ऐसे अ, कि जा लुगी परमेश्वर के राज सामर्थ मुंझ नु देखले आईएँ ता लुगी सो मरदे ना।”

ईसा की सकल बदलुणी

²छअ दुस के बाद ईसाएँ आपड़े सात पतरस, याकुब अंर यऊनाक नेएँ अंर एक सुनसान टिराच नठे। तेकी तिऊँके सामणी तेसकी सकल बदलुई नठी। ³अंर ईसा के गटूण ईछे सुकले गोए कि चमकंदे लागे जिछे दरतियाच कोई बी दोबी दोई करी चमकाई ना सकी। ⁴अंर तबी चेलीएँ मुसाक अंर एलियाक परगट अंदुई देखे अंर तिऊँवें ईसा के सात बाता ती लेई लाई। ⁵तबी पतरसएँ ईसाक बोलो कि, “ओले गुरजी, आमारो ऐकी रण आछो अ। आमे तीन होड़े भाणमे एक तेरे अरनीअंदो, एक मुसा के, अंर एक एलिया के अरनीअंदो।” ⁶पतरसएँ किछ बी समझी ना सको की में का बोलअन, काईकी सो डरी ता रा। ⁷अंर तबी बादो आओ अंर तिऊँच जा छाऊई अंर तेथु बादे बितोड़ी एई भाष आई, “यो मेरा प्यारा बेटा अ ऐसकी सुणो।” ⁸तबी तलाई तिऊँवें उण्डो पुण्डो ऐरो अंर ईसाक छोड़ी करी तिवें ओरुक कसिक ना देखे। ⁹जबी सो टिराची ऊँदे लागे आंदे तबी ईसाएँ तिऊँक बोलो कि, “जा दुरी आदमी का

¹ कुरुस का मतलब अ मरन दुरी आपड़ा दुख आपुई जेलना।

बेटा मरी करी पछी जीऊँदा नु जाला ता दुरी जेओ किछ तुवें देखो अ सेओ कसी बेर नु बोलीया।”¹⁰ तिऊँवें ऐथु बाताक आपस मुंझ ती लेई पुछी कि, “मरी करी पछी जिऊँदे जाण का का मतलब अं।”¹¹ चेलीएँ ईसा बेरी पुछो कि, “सास्त्री काई बोलअअं कि एलिया बाकी को पोईले आण जरुरी अ।”¹² ईसाएँ जबाब देना कि, “एलिया पोईले आई करी सब ठिक करदा, पर आदमी के बेटे के बारे मुंझ ऐसो लिखीए अ कि सो भरी दुख जेलदा अं गटीया गिणूँदा? ¹³पर आऊँ तुमुक ऐसो बोलअअं कि, एलिया आई रा, अं जेसो तेसके बारे मुंझ लिखीए तो लोगुएँ तेसके सात जेसो चाओ तेसोई बुरो करो।”

छोरे पाण्डी दुष्टांग खेराण

¹⁴जबी ईसा, पतरस, याकूब अं यऊना ओर चेली ढाई पोऊँछे तबी तिवें देखो कि तेवड़ी सी एक बड़ी बीड़ कठी रेई अई। अं किछ सास्त्री चेली से बोलअ चाल ते लागीएँ करदे ¹⁵अं जेसाई लोगुएँ ईसाक देखा तबी सो ताजुब रे मानी अं सारे लोग दोऊड़ी करी ईसा ढाया नठे अं तेसके ढाल करी। ¹⁶ईसाएँ लोगु बेरी पुछो कि, “तारी चेली से का बोलअ चाल ती लागीएँ अंदी?” ¹⁷बीड़ा मुंझी एकई जबाब देना, “ओले गुरजी, में आपड़ा बेटा, ताऊँ बेर ता राखा लेई अं तेस पाण्डो दुष्टांग रो लागी अं तेथुवें तेसके गुंगा राखा भाणी। ¹⁸जबी सो दुष्टांग तेस पाण्डो आवं अ तबी सो तेसके पटकी लावं अं खाबा पुण्डी सेपा छूटअं अं सो आपड़े दांद कुरचं, अं माड़ा रा जांदा लागी। में तेरे चेलीक बोलो कि, “ऐस पाण्डी यो दुष्टांग दुर देओ खेराई पर तिऊँई खेराई ना सको।” ¹⁹तबी ईसाएँ जबाब देना, “ओ अबिश्वासियो आऊँ तारे सात कदी दुरी रंदा? अं कदी दुरी तारी खेवंदा?” अं ईसाएँ बोलो कि, “तेस छोऊटेक मुँ ढाई लेओ ऊण्डा।” ²⁰आदमीयेतेसके ईसा ढायालेया अं जबी दुष्टांगई ईसाक देखा तबी तलाई तेस छोऊटेक मोरोड़ी करी धईनी देना पटकी अं खाबा पुण्डी सेपा लागी छूटदी अं धईनी पलटुंदा लागा। ²¹ईसाएँ तेसके बाबा बेरी पुछो कि, “ऐसकी ऐजी आलत कदी से अ?” तेणे बोलो, “नेन्द्रीयाई कूणकी अ। ²²दुष्टांगई ऐसके मारनं के अरनी, कलाई आगी मुंझ अं कलाई पाणी मुंझ रुड़ाआ, पर जे तु किछ करी सके त आमुच दया करा।” ²³ईसाएँ तेसके बोलो कि, “तूँ ऐसो काई बोले, जे किछ तु करी सके? जे कुणिएँ बिस्वास करअ

त तेसके अरनी सब कुछ सकं अई।” 24छोरे के बाबाएँ ललियाई करी बोलो कि, “ओ प्रभु आऊँ बिस्वास करू, मेरे अबिस्वासक धुर कर।” 25जबी ईसाएँ देखो की लोग दोऊड़ी करी कठे लागीएँ अंदे, तबी तेणे दुष्टांगक बुरजाई करी बोलो, “ओ झाईरे अंर गुंगे दुष्टांग आऊँ ताऊँखे ऊकम देवं कि ऐसदी धुर नठ अंर ऐसदो पछी कदी नु आया।” 26तबी दुष्टांग तेसदी ललीयाई करी अंर तेसके मरोड़ी करी दुर नठो अंर छोरा बेओस ता रा अई तबी किछ लोग बोलअदे लागे कि, “यो मरी गा।” 27तबी ईसाएँ तेसका आत पाकड़ी करी तेसके उबा ऊजीया अंर सो खड़ा अवा। 28अंर जबी सो दारके पोऊछी गा तबी तेसके चेलीएँ ऐखले को तेस बेरी पुछो कि, “आमे ऐथु दुष्टांगक काई ना सको खेराई?” 29तबी ईसाएँ तिऊँक बोलो कि, “ऐसनो दुष्टांग बगर पराथना को सकी ना खेराई।”

आपड़े मरनं के बारे मुंझ फेर बोलअन

30तबी सो तेकीई गलील बाठु धुर लागे जांदे, अंर ईसा यो चाई नु ता कि कसीक बी मेरे बारे मुंझ पता चलअ, 31काईकी तेणे आपड़े चेलीक ते ले समजाई कि, “आदमी के बेटेक आदमी के ई आतु लेयाई दोखे से पकड़वांदे अ अंर सो तेसके मारी गेरदे अंर सो मरनं के बाद तीजे दुस पछी जिऊँदा जांदा।” 32ऐई बात तिऊँके समज मुंझ आईना, अंर सो ईसा बेरी पुछनक डरं ते।

सबसे बड़ा कूण अ

33तबी सो कपरनूम आए अंर दारके पोऊँछी करी ईसाएँ आपड़े चेली बेरी पुछो कि, “बाटा तुवें कथु बारे मुंझ बात चीत ती लेई करी?” 34सो सब चुप रए काईकी तिऊँवें बाटा, ऐई बातचीत ती लेई करी कि, ‘आमु मुंझी बड़ा कूण अ। 35तबी ईसाएँ बेठी करी, आपड़े बारअ चेलीक आपु ढाई बोईदे, अंर तेणे बोलो कि, “जे तुमु मुंझी कोई बड़ो चावं बणनअ त सो सबुसे नेन्द्रा बणला अंर सबुकी सेवा करला।” 36तबी तणे एक लाइकटो बोईदो अंर तिऊँके बिचंदो खड़ो करो, अंर फानांदो गाड़ी करी चेलीक बोलो, 37“जा कुणीए मेरे नावं से ऐसने लाइकटीक अपनाला, सो मुंखे अपनांदा अर जो कुणीए मुंखे अपनाला, सो मुंखेई ना पर मेरे बेजन वाड़ेक अपनांदा।”

जो बिरोद ना करी सो आमारे बिला अ

38यऊनाए ईसाक बोलो, “ओले गुरजी, आमे एक आदमीक तेरे नांव से दुष्टांगक खेरांदुई देखा अंर आमे तेसके रोकी ता लेया काईकी सो आमारे सात का नु ता आथी।” 39तबी ईसाएँ बोलो कि, “तेसके रोकीयानू, काईकी ऐसा कुणीएँ ना आथी जो मेरे नांव से चमत्कार के काम करला, अंर तलाई मुंखे बुरो बोलअला, 40काईकी जो आमारा बिरोद ना करी, सो आमारे बिला अ। 41आऊँ तुमु बेर साची लाऊँ कि जे कुणीएँ तूँक मसी के झाणी करी एक गीलास पाणी का बी प्याला तबी तेथु का फल तेसके जरूर मिलदा।”

ठेसा लागन कि बजे बणला

42“जे कुणी ईऊँ नेन्द्रे लाइकटी मुंझी जो मुईच बिस्वास करअ तिऊँक पाप करने सिखाला त तेसके अरनीभलो ऐजो अ कि, तेसके टाटुंदा गटं का पाथर बाधी करी तेसके समुद्रंदा देणा फेण्डाई। 43जे तेरा आत ताऊँ बेरी पाप करावं त तु तेथुक काटी गेर, डुण्डे अई करी तेरो अमर रण आछो अ बजाएँ ऐथुके कि तेरे दुई आत अंदुई बी नरख मुंझ गेरले जेतु की आग कदी ना ईटी। 44j 45जे तेरो गोडो ताऊँखे पाप के बिला लेजावं त तु तेथुक काटी गेर, लंगडे अई करी तेरो अमर रण आछो अ बजाएँ ऐथु के कि तेरे दुई गोडे अंदुई बी नरख मुंझ गेरले। 46k 47जे तेरी आख ताऊँ बेरी पाप करावं त तेथुक गाड़ी करी धुर दे फेण्डाई, तेरे अरनीआछो ऐजो अ कि काणे अई करी तूँ परमेश्वर के राज्य मुंझ जाला बजाएँ ऐथु के कि तेरे दुई आखी अंदुई बी नरख मुंझ गेरले। 48जेकी ना आग ईटी अंर ना किड़ो मरी। 49सबु लोगुंक आगी मुंझ सुचा बाणदे। 50नूण आच्छो अ पर जे नूण का स्वाद नठला बिगड़ी त तेथुक कथु लेयाई नुणाओ बाणदे? आपुंदा नुण जेसा स्वाद राखो अंर मेल चाला के रओ।”

छूट के बारे मुंझ ईसा को सिखाणं

101तबी सो तेकीई ऊजुई करी यऊदीया मुलक बाठुई यरदन नदी के पाईले बिला नठा, अंर भीड़ फेर तेस ढाई कठी अई, अंर जेसी तेसकी आदत ती तेसेई सो तिऊँक फेर सिखांदा लागा। 2तबी किछ फरीसी लोगुएँ ईसाक परेखन के अरनीतेस बेरी

। जेकी ना आग ईटी अंर ना किड़ो मरी। k जेकी ना आग ईटी अंर ना किड़ो मरी।

पुछो, “का यो आछो अ कि ख्वांद आपड़े जोरुवाक छोड़ी देला?”
³तेणे तिऊँक जबाब देना कि, “मुसाएँ तुमुक का ऊकम देना?”
⁴तिऊँई बोलो कि, “मुसाई ऐजा ऊकम देना कि ख्वांद आपड़े जोरुवाक छूट लिखी करी सो तियाँक छोड़ी सकं।”⁵तबी ईसाएँ तिऊँक बोलो कि, “मुसाएँ ऐजी बात ऐथु बजे से लिखी कि तुवें परमेश्वरअ का ऊकम माननक तयार ना आथी।⁶ऐथु दुनीया के सुरुआत से ई परमेश्वरएँ तिऊँक मरद अंर बेटकुड़ी भाणी।⁷अंर ऐथु बजे से मरद आपड़े ईजी बाबाक छोड़ी करी आपड़े जोरुआ के सात रंदा।⁸अंर सो दुयाएँ एक सरीर अंदे, ऐब सो दुई लोग आथीना पर एक अ।⁹जिऊँकी जोड़ी परमेश्वरएँ राखी भाणी तिऊँक आदमीएँ अलग ना चाए करीएँ।”¹⁰दारके चेलीएँ ऐथु बारे मुंझ ईसा बेरी फेर पुछो।¹¹ईसाएँ चेलीक बोलो, “जा बी कुणीए आपड़े जोरुवाक छूट देई करी ओके बेटकुड़ीया के सात जोजोड़ा भाणला त सो पोईलीया के खिलाफ भेविचार करं,¹²अंर जे बेटकुड़ी बी आपड़े ख्वांदक छोड़ी करी ओका जोजोड़ा भाणली तबी सो बी भेविचार करं।”

ईसाएँ लाइकटीक आसिरबाद देना

¹³तबी लोग ईसा ढायालाइकटे लेंदे लागे की सो तिऊँक आसिरबाद देला, पर तेसके चले तिऊँक बुरजांदे लागे।¹⁴ईसाएँ जबी ऐजो देखो तबी तेणे गुस्से मुंझ आई करी आपड़े चेलीक बोलो, “लाइकटीक मुँ ढायाआणई देओ तिऊँक रोकियानु काईकी परमेश्वर का राज ऐसनी का ई अ।¹⁵आऊँ तूँ बेर साची लावं कि जो कुणीए परमेश्वर का राज ईऊँ नेन्द्रे लाइकटी के बाँती नु अपनाला, त सो कदी बी तेंदा जाई ना सकी।”¹⁶तेणे तिऊँक फानांदे गाड़ी करी आपड़ा आत लाइकटी के मुण्डीयाच राखा अंर आसिरबाद देना।

सोकार छोरेइ ईसा बेरी प्रश्न पुछा

¹⁷जबी ईसा तेकीई नठी गा, तबी बाटा एक जुआन छोरा दोऊड़ी करी ईसा ढायाआया अंर तेसके सामनी गुण्डी नाई करी पुछो, “ओले आछे गुरजी, अमेसा की साची जिन्देगी पाण के अरनीमें का करनअ?”¹⁸ईसाएँ तेसके बोलो कि, “तूँ मुखे आछा काई बोले? परमेश्वरक छोड़ी करी कुणीएँ बी आछा ना आथी।¹⁹तूँ नियमक झाणीना? ‘कसकेई जान से नु मारीया, भेविचार नु

करिया, चोरी नु करिया, जुटी गबाई नु देया, छल नु करिया, अंर आपड़े ईजी बाबा की इजत करीया।”²⁰तेणे ईसाक बोलो, “ओले गुरजी, ऐजे नियम त आऊँ नेन्द्रीयाई कुणकी मानु।”²¹ईसाएँ तेसके बीला नजर लाई अंर तेसके जुरा अंर तबी बोलो कि, “ताऊँन्दी एक बाता कि कमी अ, तूँ जा, अंर ताऊँ बेर जो बी किछ असअं तेथुक बिकी करी गरीबु मुंझ दे बांटी अंर ताऊँखे स्वरग मुंझ धन मिलदो अंर तबी तूँ मुँ पंछीण्डा आ।”²²ईसाएँ जबी ऐसो बोलो तबी सा जुआन छोरा दुखी नठा अई अंर परसान अई करी तेवड़ी धुर नठा काईकी सो भरी सोकार ता।²³ईसाएँ चारू बिला ऐरी करी आपड़े चेलीक बोलो कि, “सोकार आदमी को स्वरग जाण कुछो अखो अ।”²⁴ऐथु बाताच चेलीक सुच बेठी, तबी ईसाएँ फेर बोलो, “ओ मेरे लाइकटीओ, स्वरग मुंझ जाण कुछो अखो अ।²⁵ऊँटा को सेवणी के पासे पुण्डो जाण सुखो अ, पर सोकार आदमी को स्वरग मुंझ जाण कुछो अखो अ।”²⁶तबी तिऊँक ओर सुंच बेठी, अंर सो आपस मुंझ बोलअदे लागे कि, “तबी कुण सकं बची?”²⁷ईसाएँ तिऊँके बिला ऐरी करी बोलो, “आदमी त यो सकीना करी, पर परमेश्वर यो करी सकं काईकी परमेश्वर सब कुछ सकं करी।”²⁸तबी पतरसएँ तेसके बोलो, “देख, आमे आपड़ो सब कुछ छोड़ी करी ताऊँ पछीण्डे रे आई।”²⁹तबी ईसाएँ बोलो कि, “आऊँ तूँ बेर साची लाऊँ, कुणीऐई बी मेरे या आछी खबर के अरनीआपड़ो गर, आपड़े भाई-भईण, आपड़े ईजी-बाबा, आपड़े लाइकटे या आपड़े डोखरे देले छोड़ी।³⁰तबी ऐथु बखते जादा पांदे अंर सो सो गुणो जादा गर, भाई-भईणी, ईजाऊँक, लाइकटे अंर डोखरे पांदे। पर तिऊँच सताव बी आंदा अ अंर आण वाड़े जुग मुंझ परमेश्वर तिऊँक अमेसा का जीवन देंदा।³¹जेसकी पूछ ऐला अ तेसकी रंदी ना अंर जेसकी पूछ ऐला आथीना तेसकी पूछ अंदी।”

तीजाएँ आपड़े मरनं के बारे मुंझ बोलो

³²जबी सो यरूसलेमक जांदे ते रे लागी, तबी बाटा ईसा तिऊँसे आगीण्डा ता लागीएँ आण्डदा। अंर चले डरी ते रे अंर जे तिऊँ पछीण्डे ओर लोग ते सो बी डरी ते रे। तबी ईसाएँ आपड़े बारू चेलीक अलग नेई करी तिऊँ बेर बोलो कि, “मेरे सात का अण वाड़ो।³³सुणो, आम यरूसलेम रे जांदे लागी, आदमी का बेटा दोखे से पकड़ाया जांदा अंर बड़े पुजारी अंर धर्म शास्तीऊँ बेर सोपदे। अंर

सो तेसके मोत की सजा सुणांदे अंर गेर यऊदी के आतंदा सोपी देंदे। ³⁴अंर सो तेसके मजाक भाणदे, अंर तेसदो थूकदे, अंर सो तेसके कोड़े मारदे, अंर तबी तेसके मारी गेरदे, अंर सो तीजे दुस पछी जिऊंदा जांदा।”

याकुब अंर यऊना की ईसा से विनती

³⁵तबी जबीदी के बेटे याकूब अंर यऊनाएँ ईसा ढायाआई करी बोलो, “ओले गुरजी, आमे ऐजो चावं कि जो किछ आमे ताऊं बेरी मांगमे, सो तु आमारे अरनीकरला।” ³⁶ईसाएँ तिऊँक बोलो, “तुमे का चावं जो आऊं तुमारे अरनीकरमा?” ³⁷तिऊँवें ईसाक बोलो, “आमुक ऐजा वरदान दे कि जबी तेरा राज सक्ति के सात आला अंर तू आपड़े राजगदीयाच बेठला तबी तू आमुक एकक धईने अंर ओकेक बावें बिला बेठन का अक दे।” ³⁸ईसाएँ तिऊँक बोलो कि, “तुवें ऐजो जाणी ना, की कालो मांगी? जा दुख का कोटोरा आऊं पिणु वाड़ा अ, सा तुवें पी सकंदे? अंर जा नाईण आऊं करनअ वाड़ा अ, सा तुवें करी सकंदे?” ³⁹तिवें ईसाक बोलो, “आमे करी सकंदे।” ईसाएँ तिऊँक बोलो, “जा कोटोरा आऊं पिणु वाड़ा अ, तेथुक तुवें बी पींदे अ, अंर जा नाईण आऊं करनअ वाडा अ, सा तुवें बी करदे अ। ⁴⁰पर आपड़े धईने अंर बाएँ बिला बेठाणे मेरे बसकी बात आथीना ऐथु जागाच सो ई सकं बेठी जीऊं के अरनीपरमेश्वरएँ ऐई जागा बाणी राखी।

⁴¹अंर जबी ओर दस चेलीएँ ऐजो सुणो तबी सो याकुब अंर यऊनाच नाराज अऐ। ⁴²तबी ईसाएँ तिऊँक आपु ढाई बोईदी करी बोलो, “तुवें ऐजो जाण कि, जे लोग यऊदी आथीना तिऊँके जे स्याणे अं, सो आपड़े लोगुच अक राखं अंर जे परदान अं सो सबुच अक जताअं। ⁴³पर तुमू मुंझ ऐसो आथीना जा बड़ा चावं बणन सो पोईले सबुका सेवक बणला ⁴⁴अंर जा कुणीएँ तुमू मुंझी परदान बणन चाला, सो सबुका दास बणला। ⁴⁵काईकी आदमी का बेटा आपड़ी सेवा करांदा रा ना आई पर सो लोगु की सेवा करदा रा आई अंर भरी लोगु के छुटकारे के अरनी आपड़ी जान देंदा रा आई।”

काणे बरतिमाई के आखे आछे बाणे

46 फेर ईसा अंर तेसके चले यरीओ पोऊछे, अंर एक बड़ी बीड़ तिऊँके सात ती अंर जबी सो यरीओ छोड़ी करी पछी जांदे लागे तबी तिमाई का बेटा बरतिमे नांव का एक आंधा बिकारी सड़का के किनारे ता बेठीएँ। 47 जबी तेणे ऐजो सुणो कि नासरत गावं का ईसा लागीएँ जांदा तबी तेणे ललियाई करी बोलो, “ओ दाऊद की खानदानी का ईसा, मूँच दया करा।” 48 भरीसी आदमीएँ तेसके बुरजाई करी बोलो कि, “तूँ चुप रअ” पर सो ओर जोर से ललीयांदा लागा, “ओ दाऊद की खानदानी का ईसा, मूँच दया करा।” 49 तबी ईसाएँ रुकी करी बोलो कि, “तेसके मु ढाई लेओ आण्डा” तबी लोगुएँ आन्देक बोलो कि, “ईमत राख अंर ऊबा ऊजुँ, ताऊँक ईसाएँ अटाई लेया।” 50 तेणे आपड़ा चोड़ा फेण्डाई देना अंर झट पट ऊजुई करी ईसा ढायानठा। 51 तबी ईसाएँ तेसके बोलो कि, “तूँ का चाएँ जो आऊँ तेरे अरनीकरमा?” आन्देएँ ईसाक बोलो, “ओले गुरजी, आऊँ ऐजो चावं कि आऊँ फेर से आपड़े आखी लेयाई देखी सकंमा।” 52 ईसाएँ बोलो कि, “जा तेरे बिस्वासएँ ताऊँखे आछा भाणा” अंर सो तलाई देखदा लागा अंर ईसा पछीण्डा आण्डदा लागा।

यरुसलेम मुंझ ईसा के आण की खुशी मनाणी

11 1 जबी ईसा अंर चले यरुसलेम के नजदीक, जेतुन टिराच बेतफगे अंर बेतनिय्या ढायापोऊँछे तबी ईसाएँ दुई चेलीक बेजे 2 कि, “सामणी के गावंदे जाओ अंर तेकी पोऊँछी करी एक जुआन गधा बाधीएँ मिलदा, जेसीच ऐला लुगी कुणी ना रे बेठी, तेसके खोली लेओ। 3 अंर जे कुणीए तुमू बेरी पुछले कि “यो का लो करी” तबी जबाब देया कि, ‘प्रभुक ऐसकी जरवत अं,’ अंर सो ऐसके झट पछी बेजी देंदा।” 4 दुई चेली जाई करी देखो कि एक जुआन गधा कुड़े के भाईले बिला बाटा पुण्डा दारअ पाण्डा ता बाधीएँ अंर सो खोलदे लागे। 5 अंर तेवड़े किछ आदमी खड़े ते तिऊँवें बोलो कि, “तुवें यो का लो करी? अंर यो जुआन गधा काई ला खोली?” 6 तबी जेसोई ईसाएँ चेलीक बोली तो राखो तेसोई तिवें लोगुंक बोलो अंर तबी लोगुएँ तिऊँक जाणीई देने। 7 तिऊँवें जुआन गधा ईसा ढाई लेई करी आपड़े गटुण खोले अंर तेसीच बिछाएँ अंर तबी ईसा तेसीच बेठा। 8 तबी ईसा का स्वागत करनअ के

अरनीकिछ लोगुएँ आपड़े भाईले गटुन खोली करी बाटांटे बिछाएँ अंर किछ लोगुएँ डोखरी पुण्डी बुटु की साईं काटी करी बाटांटी बिछाई। ⁹अंर जे तेसके आगीण्डे अंर पछीण्डे आण्डदे ते लागीएँ सो ललीयाई करी ते बोलअ, “प्रभु की जे जे कार ओ, जो प्रभु के नांव से आवं तेसके परमेश्वर बरगत देंव। ¹⁰आमारे बाबा दाऊद का राज जा आई लागा तेथुच परमेश्वर बरगत देंव। अंर सबु से ऊँचे स्वरग मुंझ प्रभु की जे जे कार ओ।” ¹¹ईसा यरूसलेम आई करी मंदिर पुण्डा नठा अंर चारू बिला सारो समान ऐरो अंर आपड़े बारू चेली के साथ बेतनिय्याक नठा काईकी पछा का बखत ता रा अई।

अंजीर का बुट

¹²दोतके जबी ईसा अंर तेसके चले बेतनिय्याई जांदे लागे तबी ईसाक बुक लागी। ¹³तेणे दुरेई अंजीर का अरा बरा बुट देखी करी तेथु ढायानठा की तेथु पाण्डो किछ फल अले। पर पातु के सिवा तेथु पाण्डो किछ ना मिलो काईकी तला फल लागन की रीत आथीनुती। ¹⁴तबी ईसाएँ तेथु बुटक बोलो कि, “ऐला के बाद कुणीएँ बी तेरे फल खाई ना सकंदे” अंर ऐई बात तेसके चेलीएँ बी सुणी।

मंदिर पुण्डी बाणीएँ खेराए

¹⁵तबी सो यरूसलेम पोछी करी मंदिर पुण्डा नठा अंर जे मंदिर पुण्डे बणीज बाटा ते लागीए करदे तिऊँक ईसा बाण्डे देने खेराई अंर पईसी का सोदा करनअ वाड़ी के मेच अंर कबुतर बिकन वाड़ी के तखत पलटी देने। ¹⁶अंर तेणे मंदिर पुण्डी कसकेई बी किछ समान लेजाणई ना देन। ¹⁷अंर सो तिऊँक समजांदा लागा कि, “धर्मशात्र पाण्डो ऐजो लिखीएँ कि ‘मेरो गर सारे जाती के लोगु के अरनीपराथना को गर बोलअदे?’ पर तुमे ऐथुक चोरूँ का अडा राखा बाणी” ¹⁸जबी बड़े पुजारीयूँई अंर धर्मशात्री ऐजो सुणो तबी सो ईसाक खतम करनअ का मोका लागे ऐरदे। पर सो डरं ते काईकी लोग ईसा के बातु सुणी करी ताजुब ते रं मानी। ¹⁹जबी बेऊक का बखत अई गा तबी सो तेथु सईरन्दी भाण्डे नठे।

बिस्वास कि तागत

²⁰दोतके रातीएँ ऊजुई करी जबी ईसा अंर तेसके चले तेथु बाट बाटु नठे तबी तिऊँवें तेथु अंजीर के बुट जड़ीयाऊँ सुदा सुकीएँ देखा। ²¹पतरसकं सेजी बात आद आई अंर तेणे बोलो, “ओले

गुरजी, जेथु अंजीर के बुटक तें सराप ता देना सा सुखी रा।
²²ईसाएँ तिऊँ जबाब देना, “परमेश्वरच बिस्वास राखो। ²³आऊँ तूँ
 बेर साची लाऊ की जे कुणीएँ ऐथु टीराक बोलअले की ऐवड़ी ऊखड़ी
 करी समुद्रंदी पड़ अंर आपड़े जीयंदा सकं नु करले पर बिस्वास
 राखले त जेसो तेणे बोलो अ तेसके अरनीतेसोई अंदो। ²⁴ऐथु
 अरनीआऊँ तुमुक बोलू “जो किछ तुम पराथना मुंझ मांगले अंर
 ऐजा बिस्वास करले कि तुमुक मिली रो त तुमुक मिली जांदो।
²⁵जबी बी तुमे पराथना करदे ऊजुले अंर तुमारे जीयंदा कसी के
 अरनी बिरोद अला त तेसके माफ देया करी काईकी तारा स्वरगीय
 बाबा बी तारे गलतीयाऊँक माफ करदा। ²⁶(पर जे तुवें माफ नु
 करले त तारा स्वरगय बाबा बी तेरे गलतीयाऊँक माफ न करदा।)”¹

ईसा के अकच यऊदी नेताऊ का सक

²⁷ईसा अंर तेसके चेले पछी यरूसलेम आए अंर ईसा मन्दिर के
 आंगणे पुण्डा ता लागीएँ फिरदा तबी बड़े पुजारी, धर्मसास्त्री अंर
 यऊदी बाट-बाठे तेस ढायाआए। ²⁸अंर सो बोलअदे लागे कि, “तूँ ऐ
 काम कथु अक से करें? अंर ऐथु कामअ करनअ का अक ताऊँक
 कुणे देना?” ²⁹तबी ईसाएँ तिऊँक बोलो कि, “आऊँ तूँ बेरी एक
 सवाल पुछुं, अंर तूँवें मुंखे तेथुका जबाब देओ तबी आऊँ तूँ बेर
 बोली देंदा कि या काम आऊँ कथु अक से करूँ। ³⁰जा यऊना का
 नाईण ता सा परमेश्वर के बिलाई ता कि आदमी के बिलाई ता?
 तूँवें मुंखे जबाब देओ।” ³¹सो आपस मुंझ ठाटदे लागे कि, “जे आमे
 ऐसो बोलअ कि ‘परमेश्वर के बिलाई ता,’ त सो ऐसो बोलअदा कि,
 ‘तूँवें तेथुच बिस्वास काई ना करा?’ ³²अंर जे आमे ऐसो बोलअ
 कि, ‘सो आदमी के बिलाई ता,’ त सो लोगुंक ते डरं, काईकी सब
 लोग यो मान ते कि यऊना साचे का बाकी अ।” ³³तबी तिवें ईसाक
 जबाब देना, “आमे जाणीना।” ईसाएँ तिऊँक बोलो, “आऊँ बी तूँ बेर
 बोलीना कि या काम आऊँ कथु अक से करूँ।”

खराब मजदुरु की फारसी

12¹तबी तेणे तिऊँक फारसीयाऊ मुंझ बोलो कि, “एक
 आदमीएँ आपड़े डोखरे पुण्डे अंगुरु का बाग ता राखा लाई
 अंर चारु बिला बाड़ देनी करी अंर रस के अरनीएक गडा भाणा अंर

¹ यूनानी भासा के किछ पुराणे ग्रंथु पाण्डो 26 पद मिलीना।

एक मचांग बी भाण अंर मजदुरूक तेथुका ठेका देई करी आपु परदेस नठा। ²जबी अंगुर पाकी गोवे तबी तेणे आदमीएँ आपड़ा एक नोकर मजदुरू ढायाबेजा कि तेथु अंगुरू के बाग का ईस्सा ले मांगी। ³अंर तिवें तेस नोकरक उण्डा पकड़ा अंर मारी कुटी करी खाली आत पछी देना बेजी। ⁴फेर तेणे तिऊँ ढायाएक ओका नोकर बेजा, अंर तिऊँवें तेसकी बी मुण्डी देनी फुटोई अंर बेजती करी। ⁵तबी फेर तेणे एक ओका नोकर बेजा, तेसके तिवें खतम देना करी। तेणे आपड़े ओर बी नोकर बेजे अंर मजदुरूएँ तिऊँ के सात बी तेसोई करो कसीक मारे कुटे अंर कसीक खतम देने करी। ⁶ऐब तेस बेर बेजनक एकुवें आपड़ा प्यारा बेटा रा तेणे तेसके यो सोची करी बेजा कि मजदुर ऐसकी जो ईजत करले। ⁷तबी मजदुरूएँ आपस मुंझ ठाटो कि ऐस आदमी का एकुवें बेटा अ ऐसके मारी गेरमे अंर तबी ऐई जाईदाद आमारी अंदी। ⁸अंर तिऊँवें तेसके खतम करी करी, बाग के भाईले बिला देना फेण्डाई। ⁹ऐबे बागअ का मालीक का करदा? सो मजदुरूक मारी गेरदा अंर आपड़ा बाग ओरू बेर देंदा देई। ¹⁰का तुवें पवित्र शास्त्र पाण्डी ऐजी बात पढीना कि, “जेतु डोकक राजमिस्त्रीएँ बेकार तो राखो झाणी सो कण्डारे को डोक बणो। ¹¹ऐओ प्रभुएँ करो, जा आमारे नजिरी मुंझ चमत्कार अ।” ¹²सो ईसाक पकड़णा ते चावं पर लोगुंक ते डरअं, सो समझी ते रे कि ऐई फारसी तेणे आमुक लेई सुणाई। पर सो तेसके छोड़ी करी धुर नठे।

माल गुजारी देणी की देणी ना

¹³तबी किछ फरीसि अंर ऐरोदी लोगुंक ईसा ढायाबेजे कि सो तेसके बातु मुंझ फसाले। ¹⁴तिवें आई करी ईसाक बोलो, “ओले गुरजी आम जाण, कि तूँ साचा अ, अंर तूँ कसी आदमी कि परवा बी करीना अंर तूँ आदमी देखी करी बी बात करीना। पर तूँ परमेश्वर के बातुक सचाई से सिखाएँ, त तूँ आमुक बोलअ कि राजा केसरक माल गुजारी देणी ठीक अ कि आथीना? आमे तेसके माल गुजारी देणी कि देणी ना?” ¹⁵ईसा तिऊँकी चाल समजी ता गा तेणे तिऊँक बोलो कि, “तुवें मुंखे काई चावं परेखणा, एक दिनार लेओ ऊण्डा कि, आऊँ तेथुक ऐरी सकंमा।” ¹⁶तबी तीवें दीनार तेस ढायालेया अंर तेणे तिऊँ बेरी पुछो कि, “एथु पाण्डो कसको नांव अंर कसकी तसबीर अ?” तिवें बोलो कि, “केसर को”

17तबी ईसाएँ बोलो कि, “जेओ केसर को अ सेओ केसरक देओ अंर जेओ परमेश्वर को अ सेओ परमेश्वरक देओ।” तबी तेसीच सो बड़े ताजुब रे अई।

मरी करी पछी जिऊँदे जाव कि जाईना

18फेर किछ सदुकी लोग जे ऐजो ते मान कि मरी करी पछी जिऊँदा कुणीऐई ना जाई, सो ईसा ढाई आऐ अंर तेस बेरी पुछो, 19“ओले गुरजी, मुसाएँ आमारे अरनीलिखो कि जे कसी का भाई बगर अलादी का मरी नठला अंर तेसकी जोरू टिकी रली त तेसका ओका भाई तियाँके सात जोजोड़ा बाणी करी आपड़े भाई के अरनीलाइकटे पईदा करला। 20एक बेरा की बात अ, सात भाई ते, अंर सबसे बड़ा भाईएँ जोजोड़ा भाणी करी बगर अलादी का मरी नठा। 21तबी ओके भाईएँ तियाँके सात जोजोड़ा भाणा अंर सो बी बगर अलादी का मरी नठा। तीजे भाईएँ बी तेसोई करो। 22पर सातु भाई के बिलाई अलाद ना पईदा करूणी अंर पछारीया सेई बेटकुड़ी बी मरी नठी। 23अंर मरनं के बाद जबी सारे मरीएँ लोग जिऊँदे जाले तदुस ईऊँ सातु मुंझी यो कसकी जोरू अंटी? काईकी साताई तियाँके खांद ते।”

24तबी ईसाएँ बोलो, “तूँवें बटकिएँ अ, तूँवें ना त पवित्र शास्त्रक जाणी अंर ना परमेश्वर की सकितयाक जाणी। 25काईकी जबी लोग मरी करी जिऊँदे जाले तबी तिऊँके जोजोड़े अंदे ना अंर सो स्वरग मुंझ स्वरगदुतु के जेसे अंदे। 26मरी करी दुबारे जिण के बारे मुंझ मुसा के किताबा पाण्डो जेकी झाल जणअ के बारे मुंझ लिखीएँ अ तैथुक तूँवें पढ़ोना? तेकी परमेश्वरएँ मुसाक बोलो, ‘आऊँ इब्राईम, इसाक, याकूब, का परमेश्वर अ।’ 27परमेश्वर मरीएँ का आथीना पर सो जिऊँदी का परमेश्वर अ। अंर तूँवें लोग बड़ी भूल मुंझ पड़ीएँ।”

सबसे बड़ा ऊकम

28जबी ईसा अंर सदुकी लोग बाता ते लागीएँ लांदे तबी एक सास्त्रीएँ तिऊँकी बाता सुणी करी बोलो कि, ईसाएँ कुछा बड़ीया जबाब देना, तेणे ईसा बेरी पुछो, “सबसे बड़ा ऊकम कोजा अ?” 29ईसाएँ जबाब देना कि, “सबसे बड़ा ऊकम ऐजा अ, ‘ओ इस्राइल सुण, आमारा प्रभु परमेश्वर एकुवें अ।’ 30अंर तु आपड़े परमेश्वरक सारे जीय से, सारे पराण से अंर आपड़ी सारे समज से अंर आपड़े

सारे जोरअ से तूँ परमेश्वरक जुर।³¹ अंर ओका ऊकम एजा अ कि अपड़े पोड़ोसीक आपु जेसा जुर। अंर ऐथु से बड़ी करी कोजाई ऊकम ना आथी।”³² सास्त्रीएँ तेसके बोलो, “ओले गुरजी, तें बड़ीया जबाब देना कि, ‘प्रभु परमेश्वर एकुवें अ अंर तेस छोड़ी करी ओर कुणीएँ बी परमेश्वर ना आथी।’”³³ अंर तेणे बोलो कि, “आपड़े सारे जीयसे, अंर आपड़ी सारे समज से अंर आपड़े सारे जोरअ से परमेश्वरक जुर। अंर आपड़े पोड़ोसीक आपु जेसा जुर अंर ऐजी बाता सारे ऊँम बली^m अंर बलीदानु से बड़ी करी अ।”³⁴ जबी ईसाएँ देखो कि सास्त्रीएँ सोची समजी करी जबाब देना तबी तेणे बोलो कि, “तूँ परमेश्वर के राज्य से दुर आथीना।” तबी कसीक बी ईसा बेरी पुछन की ईमत ना अई।

मसी कसका बेटा अ?

³⁵ तबी ईसाएँ मंदिर पुण्डो लोगुंक सिखांदुई बोलो कि “सास्त्री कसो बोलअ कि मसी दाऊद के खानदानी का बेटा अ? ³⁶ दाऊदएँ सुचे आत्मा मुंझ बरुई करी बोलो, ‘प्रभु (परमेश्वरएँ) मेरे प्रभुक (मसी) बोलो कि, मेरे दर्ईने बिला बेठ ता दुरी आऊँ तेरे दुसमनुक तेरे गोडी थाले नु देमा करी।’ ³⁷ त आपुई दाऊद मसीक प्रभु बोलअ त मसी दाऊद का बेटा कसा अंदा?” अर एक बड़ी बीड़ ऐई बाता खुशी से ती लागीए सुणदी।

³⁸ तेणे सिखांदुई बोलो, “धर्म सास्त्रीऊँ से बची करी रया तिऊँक लाम्बे चोगे बिड़ी करी ऊण्डो पुण्डो फिरन आछो लागं अंर बजारंदी लोगु की ढाल लेणी आछी लागं। ³⁹ अंर सो दियाण्डे पुण्डे आगिण्डो चांव बेठन अंर खाण खांदुई बी आगिण्डो सुचं बेठन। ⁴⁰ यो विधवाऊँ दोखा देवं अंर तिऊँके गर लुटं। अंर लोगुंक देखाण के अरनीलाम्बी लाम्बी पराथनाएँ करं। ईऊँ लोगुंक अखी से अखी सजा मिलदी।”

साचा दान

⁴¹ ईसा मंदिर पुण्डा दान पेटीया के सामणी मुंझ ता बेठीएँ अंर सो ऐरदा ता लागीएँ कि कुण कुछोड़ा दान पेटीयांदा गरें। बरी से सोकार लोगुएँ खूब पईसे दान पेटीयांदा गरे। ⁴² तबी एक गरीब विधवा बेटकुड़ी आई अंर तियाँई दुई दमड़िया दान पेटीयांदी गेरी जेई एक पईसे के बराबर बी आथीनु ती। ⁴³ तबी तेणे आपड़े चेलीक

^m ऊँम बली मुंझ चईनक पूरो ते गरें आगी मुंझ ढई।

आपु ढायाबोईदे अंर बोलो कि, “आऊँ तूँ बेर साची लाऊ, सोकार लोगुएँ जा ऐथु दान पेटीयांदा दान गेरा तिऊँसे कई गुणा बड़ी करी ईयाँ गरीब विधवा का दान अ। ⁴⁴काईकी सोकार लोगुएँ सेजा दान गेरा जे तिऊँ बेर फालटु के पईसे ते पर ईयाँएँ आपड़े गरीब आलत मुंझ जो किछ ईयाँ बेर असं तो सब देनो गेरी काईकी ईयाँ बेर ईछोई तो, जा ईयाँका जिण का सारा ता।”

मंदिर नास अण कि चेताऊनी

13¹जबी ईसा मंदिर पुण्डी भाण्डा ता लागीएँ जांदा तबी तेसके एक चेलेई बोलो, “ओले गुरजी, देख, कुछे बड़े-बड़े डोक अ अंर कुछे बांके कूड़े अ। ²तबी ईसाएँ बोलो, “तूँवें बांके कूड़े ऐरे, ऐकी एक डोक बी ओके डोकच ना रंदो जेथुक डालेनु।”

³ जबी ईसा मंदिर के सामणी जेतुन टिराच ता बेठीएँ, तबी पतरस, याकूब, यऊना, अंर अन्दियासई, ईसाक ऐखले लेजाई करी पुछो, ⁴“आमू बेर बोलअ कि ऐई बाता कला अंदी? अंर जबी ऐई बाता पुरी अली तबी तेथु बखत का, का चिन अंदा?” ⁵ईसाएँ तिऊँक बोलो कि, “तूँवें चोकस रओ कि तूँमुक कुणीएँ दोखा नु देले। ⁶भरी लोग मेरे नांव लेई करी आंदे अ अंर बोलअदे कि, ‘आऊँ सेजाई अं।’ अंर भरी लोगुंक दोखा बी देंदे। ⁷जबी तूँवें जगड़े अंर जगड़ी कि बाता सुणले तबी डरीया नु काईकी ऐथु बाता को अण जरूरी अ पर तेथु बखत अन्त ना अंदा। ⁸काईकी जाती-जाती अंर राज्य-राज्य आपस मुंझ झगड़े भाणदे अंर सबतिई बूंचे लागदे अंर बिधराव पड़दी। अंर ऐजी बाता ऐसी अ जेसी लाइकटे अंदुई सुरुआत कि पीड़ लागं।

⁹पर तुवें आपुई चोकस रंया काइकी लोग तूँक कचरीया पुण्डे बेजदे अंर दियाण्डे पुण्डे तुमुक मारदे अं अंर तूँक मेरे बजेस्रे अधिकारीऊँ अंर राजाऊँ ढायाखडे करदे कि तिऊँके सामणी मेरी गबाई देले। ¹⁰पर पोईले आछी खबर सारी जाती मुंझ सुणाणी जरूरी अ। ¹¹पर जबी सो तुमूक पाकड़ी करी कचरीया पुण्डे बेजले तबी पोईले से चिन्ता नु करीया कि का बोलअन, पर जो तारे जियंदो तलाई आलो सेजोई बोलीया, काईकी बोलअन वाड़े तूँम आथीना पर सुचे आत्मा अ। ¹²भाई-भाईक दोखे से पकड़ाई करी मरांदा अंर बाबा बटेक दोखे से पकड़वांदा। अंर लाइकटे आपड़े ईजी-बाबाऊँ का बिरोद करदे अंर तिऊँक मराई गेरदे। ¹³अंर मेरे

नावं के बजेसे सब लोग तूँ से नफरत करदे पर जा जिन्देगी के आखरी दूरी सबर खाला सो ई बचदा।

मुसिबेंजाई का बखत

14“जबी तूँवें भेंकर बिनास वाड़ी चिजाऊँक तेवड़ी खडी देखले जेवड़ी सो चाई नु ती,” (पड़न वाड़े आपूई समजो कि ऐथु का मतलब का अ) “तबी जे लोग यऊदीया मुंझ अ सो टिराऊँच बागीया 15अंर जे लोग आपड़े कुड़े के लेंटरच अ सो कथुई चिजा लेंदे ऊँदे नु उतरीया अंर ना बितरे जाया। 16अंर जे डोखरी पुण्डे अले सो आपड़े गटूणु लेंदे पछी नु जाया। 17पर जेई कुणीएँ बेटकुड़ी पेटबारी या दुधयारी अली त तिऊँके अरनीसे दुस बड़ो खराब अंदो। 18अंर पराथना करो कि यो सारो स्याड़े मुंझ नु अलो। 19काईकी से दुस ऐसे मुसीबेंजाई के अंदे कि जला परमेश्वरएँ ऐथु दुनियाक भाणी अ, ना त तला ते अंर ना कदी फेर आंदे अ। 20पर प्रभु जे तिऊँ दुसुक कम नु करदा त कुणीएँ बी जिऊँदे ना बचदे पर तिऊँ लोगु के बजेसे जिऊँक परमेश्वरएँ चुनी ते राखे से दुसुक कम देने करी। 21तिऊँ दुसु मुंझ जे कुणीएँ तुमूक बोलअले कि मसी ऐकी अ या तेकी अ त तिऊँ के बाताऊँच मुणी बी बिस्वास नु करीया। 22काईकी जुटे मसी अंर जुटे बाकी खड़े अंदे अंर सो चिन अंर चमतकार देखांदे कि जे अई सकंलो त चुनीएँ आदमीक बी बईखाई देले। 23पर तूँवें चोकसी के रया काईकी में सब बाता तूँऊँ बेर पोईलेई बोली राखी।

24अंर तेथु मुसीबतु के दुसु के बाद दुस काओ पड़दो अंर जुना को आशो ना लागदो। 25अंर तारे गईणी बी छुटदे लागदे अंर गईणी की सकितयाँ ईलाई देंदे। 26तबी आदमी के बेटेक लोग बड़ी सामर्थ अंर मईमा मुंझ, बादेच आंदुई देखदे। 27तेथु बखत सो दुनियांदे अंर गईणीबे आपड़े दूत बेजी करी एक कुणे से लेई करी ओके कुणे दुरी आपड़े चुनीएँ लोगुंक कठे करांदा।

खड़कं के बुट की मिसाल

28खड़कं के बुट से ऐजो सिखो कि जबी, तेथु के सार्वी पाण्डे कुमटे अंर पात लागले, तबी तूँवें ऐजो झाणी पाया कि रूड़ नजदीक अ। 29ऐसीई ऐई सब बात जबी तूँवें अंदुई देखले तबी जाणी पाया की सेजा बखत नजदीक आई रवा अंर यो कलाई बी अई सकं।

³⁰आऊँ तूँऊँ बेर साची लावं कि जा दुरी ऐई सब बाता घटी नु जाली ता दुरी ऐई पीढ़ि मरदी ना। ³¹दरती अंर गईण खतम अई सकं पर मैरी बोलीएँ बाता अमेसा साची अं।

भीऊजे रो

³²तेथु दुस अंर तेथु बखतअ के बारे मुंझ कुणीएई ना जाणी ना स्वरगदुत अंर ना बैटा, पर बाबाई जाण। ³³सुणो, भीऊजे रो अंर पराथना करदे रो लागी, काईकी तूँवें जाणीना की सा बखत कला आंदा। ³⁴यो ऐसो अंदो कि जेसा एक आदमी आपड़ो गर छोड़ी करी परदेस जावं अंर नोकरू के बरोसे आपड़ो गर देवं छोड़ी अंर तिऊँक अलग-अलग काम देवं सोपी अंर चोकीदारक ऊकम देवं कि तूँ भीऊजा रया। ³⁵अंर ऐतूँ अरनीतुवें बी भीऊजे रया काईकी तुवें बी जाणी ना कि गर का मालीक कला आवं बेवक का आवं या अदराती का आवं, या कुकड़े के बांक देण के बखत आवं या रातीएँ का। ³⁶ऐसो न चाएँ ओ कि सो अचानक मुंझ आवं अंर तूँऊँक सुतिएँ देखं ³⁷अंर जो मैं तुमु बेर बोलअ सेजोई आऊँ सबुक बोलअ 'भीऊजे रो'।”

ईसाक मारनं की सलाव

14 ¹दुई दुस बाद फसे को तियार अंर बगेर खमीर के असकी को तियार^० आण वाड़ो तो। बड़ा पुजारी अंर सास्त्री ऐसा मोका ते लागीएँ ऐरदे कि ईसाक कसा ठगी करी पकड़णा अंर तेसके मारी गेरना। ²पर सो आपस मुंझ बोलअदे तें लागीएँ कि, “तियाँरू मुंझ ठीक ना आथी, ऐसो ना चाएँ अण कि लोग जगड़े बाण।”

³जबी ईसा बेतनिया गावंदा शेमोन, जा पोईले कोढ़ी ता, तेसके बितरे खाण खांदा ता बेठीएँ, तबी एक जुवान छोरीयाएँ संग मरमर के बाण्डेंदो भरी मड़ंगो अंर बेजाई बड़ीया गान्दी वाड़ो तेल लेई करी आई, अंर बाण्डो फुटोई करी अंर तेल ईसा के मुण्डीयांदो गेरो। ⁴तेवड़े से जे आदमी ते तिऊँ मुंझी किछ तियाँ जुवान छोरीया से रूसी करी आपस मुंझ बोलअदे लागे कि, “यो तेल काई लो बरबाद

^० फसे के दुस यऊदी लोगुक छोड़ी करी परमेश्वरएँ मिस्री लोगु के पोईलपण के लाइकटे अंर चईन के पोईलपण के बचे मारे। तेथु दुसक यऊदी लोग फसे बोल। ° ऐथु तियार मुंझ यऊदी लोग बगर सोडे के खाणको ते बाण।

करी? ⁵ऐथु तेलक जे बिकी देंदे त ऐथु कि कीमत तीन सो दिनार से बी जादा ती अंदी अंर तेथु पईसीक गरीबुक ते सकं बांटी,” अंर सो तियाँक बुरजांदे लागे। ⁶पर ईसाएँ बोलो, “छोरीयाक काई बुरजावं? तियाँक छोड़ी देओ तियाई त मेरे सात बलो करो। ⁷पर गरीब त तारे सात अमेसा रंदे अंर तुवें जबी चाले तिऊँकी मदत करी सकं, पर आऊँ तारे सात अमेसा रंदा ना। ⁸ईयाँएँ छोरीयाएँ सेजोई करो जो यो करी ती सकं, ईयाँएँ मुख दाबन से पोईले मेरे गतींदो तेल गेरो। ⁹आऊँ तूँ बेर साची लाऊँ कि जेकी बी दुनीयांदा आछे खबरा का परचार अला तेकी याँक बी आद करदे अंर याँके आछे काम की बाता लांदे।”

यऊदा इसकंरोती का बिस्वास घात

¹⁰तबी यऊदा इसकंरोती जा ईसा के बारं चेली मुंझी ता, सो बड़े पुजारी ढायानठा अंर तेणे बोलो कि, “ईसाक आऊँ देंदा तूँ बेर पकड़ाई।” ¹¹सो तेसकी बात सुणी करी बड़े खुस अवं अंर तिवें तेसके ईसाक पकड़ाण के पईसे माने। तबी यऊदा ईसाक दोखे से पकड़वाण के ताक मुंझ रा।

चेली के सात फसे को आखरी खाणको

¹²बगेर खमीर के असकी के तियार के आगले दुस जेतूँ मुंझ सो खाडू ते काटं चेलीएँ ईसा बेरी पुछो, “तूँ कोके चाएँ कि आमे जाई करी तेरे अरनीफसे को खणको तियार करमे?” ¹³तबी तेणे दुई चेलीक ऐसे बोली करी बेजे, “बजारंदे जाओ, अंर तूँक एक आदमी मिलदा जेस बेर पाणी का गड़ा अंदा चुंगीएँ अंर तूँवें तेस पछीण्डे जाया। ¹⁴तबी जेकी सो बितरे जाला तेथु बितर के स्याणेक बोलीया, गुरजीएँ पुछो कि मईमानु के खाणखाणं का डेरा कोकी अ? जेके आऊँ आपड़े चेली के सात फसे को खाणं को सकंमा खाई। ¹⁵तबी सो तूँक ऊछले पुरे एक सजाएँ कमरा देखांदा, तेवड़ोई मेरे अरनीखाणको तियार करो। ¹⁶जबी चले बजारंदे आए अंर जेसो तेणे बोलो तो तिवें तेसोई देखो अंर तबी तेकी तिवें फसे को खणको भाणो। ¹⁷बेऊके बखत ईसा आपड़े बारु चेली के सात तेकी आ। ¹⁸जबी सो खाण खांदे बेठे, तबी ईसाएँ बोलो, “आऊँ तूँ बेर साची लाऊँ कि तूँ मुंझी एक जा मेरे सात खाणको खांदा बेठीएँ सो मुंखे दोखे से पकड़वांदा।” ¹⁹सो उदास अई करी एक-एक करी करी

तेस बेरी पुछदे लागे, “का आऊँ अ?” ²⁰तेणे तिऊँक बोलो, “तूँ बारु मुंझी एक अ, जा मेरे सात कड़ाईंदी ओलण गाडं। ²¹काईकी आदमी के बेटे के बारे मुंझ जेसो लिखीएँ अ, सो तेसाई मरदा, पर तेस आदमीक आछो ना जांदो, जा आदमी के बेटेक पकड़ाला तेसके अरनीआछो ऐजो तो कि सो पईदाई नु अंदा।

प्रभु भोज

²²जबी सो खाण खांदे लागे तबी ईसाएँ कोदवा गाड़ा अंर प्रभु का धन्यवाद देना, अंर तेथुके टुकड़े बाणी करी चेलीक देने अंर बोलो कि, “ऐई मेरी गत अ।” ²³अंर फेर तेणे कोटोरा चुंगा अंर धन्यवाद देना अंर तेणे तिऊँक देना अंर तिवें सबुएँ तेथु कोटरेंदी पिओ।

²⁴तबी ईसाएँ बोलो कि, “यो मेरे लोई अ, जो परमेश्वरअ का नवा वादा अ, यो भरी लोगु के अरनीभंदो लागीएँ। ²⁵आऊँ तूँ बेर साची लाऊँ कि अंगुर की गेंगटी ता दुरी ना पींदा जा दुरी परमेश्वर के राज मुंझ नई नु पीमा।” ²⁶तबी सो भजन गाई करी जेतुन टिराच नठे।

पतरस के मुकरण के बारे मुंझ भविष्वाणी

²⁷तबी ईसाएँ तिऊँक बोलो, “तूँवें सारे मुंखे छोड़ी करी बागी नठदे, काईकी धर्मशास्त्र पाण्डो ऐजो लिखीएँ कि, “आऊँ बेडा वेक मारी गेरदा अंर बेडा ऊण्डी पुण्डी बागदी।” ²⁸पर परमेश्वर मुंखे जबी पछी जिऊँदा भाणला तबी आऊँ तूँ से पोईले गलील मुलकक जांदा। ²⁹तबी पतरसएँ ईसाक बोलो कि, “सब बाऊँ ताऊँखेछोड़ी करी जाया पर आऊँ जांदा ना।” ³⁰तबी ईसाएँ तेसके बोलो कि, “आऊँ ताऊँ बेर साची लाऊँ कि तु ऐला रात कुखड़े के दुई बेर बांक देण से पोईले तु तीन बेरा एसो बोलअदा कि आऊँ ऐसेके पछाणी ना।” ³¹तबी पतरसएँ फेर जोर से बोलो कि, “जे मुंखे तेरे साथ मरनं बी पड़लो तबी बी आऊँ ताऊँखेपछाणनक मुकरदा ना।” तबी सबु चेलीएँ बी ऐसोई बोलो।

गतसमनी बागंदी ईसा की पराथना

³²अंर तबी सो गतसमनी नांव के बागंदे पोऊँछे, तेकी ईसाएँ आपड़े चेलीक बोलो कि, “जा दुरी आऊँ पराथना करमा ता दुरी तुवें ऐवड़ेई रया बेठी।” ³³अंर तेणे पतरस, याकूब अंर यऊनाक आपड़े

सात नेए अंर सो बेजाई दुखी अंर परसान ता। ³⁴तबी ईसाएँ तिऊँक बोलो कि, “मेरो जिऊँ ऐला बेजाई उदास अ अंर ऐसो लागं कि मेरे पराण ले लागीए नीकइंदे, तुवें ऐवइई रो अंर भीऊजे रया।” ³⁵तबी सो कणीक आगीण्डे जाई करी गुण्डी नाई करी पराथना करदा लागा, अंर तेणे बोलो कि, “जे अई सकं त ऐई गड़ी मुँची टाड़ी दे,” ³⁶तबी तेणे बोलो, “ओ बाबा, ओ मेरे बाबा परमेश्वर तूँ सब किछ सके करी, या दुख का कोटरा मुँची दुर दे करी पर मेरी मरजी ना पर तेरी मरजी चाएँ पुरी अई।”

³⁷जबी सो पछी आ तबी तेणे आपड़े चेलीक सुतीएँ देखे, अंर ईसाएँ पतरसकं बोलो, “शेमोन तूँ, काई सुतें? का तुवें एक गन्टा बी भीऊजा ना सकी रई? ³⁸भीऊजे रो अंर पराथना करो ताकी तुवें मुसीबेंजाई मुंझ नु पड़ले आत्मा त तियार अ पर सरीर कमजोर आ।” ³⁹अंर सो पछी नठा अंर तेणे फेर तेसीई पराथना करी। ⁴⁰जबी सो पछी चेली ढायाआ तबी तेणे पछी तिऊँक सुतीएँ देखे काईकी तिऊँक ऊँगाई ती रोई लागीएँ अंर तिऊँक किछ बी सुजो ना कि आम एसके का जबाब देणा।

⁴¹तबी ईसा तिजारे का तिऊँ ढायाआ अंर तेणे बोलो, “का तुवें फेर बी सुतीएँ अ? बस, सेजा बखत आई गोवा कि आदमी के बेटेक दोखे से पकड़ी करी पापीऊँ के आतंदा सोपदे रे लागी। ⁴²ऊजुओ अंर चालो। देखो, मुंखे दोखे से पकड़ण वाड़ा आदमी आई लागा।”

ईसाक पाकड़णा

⁴³ईसाएँ ऐई बात बोली ती लेई कि तेसके बारं चेली मुंझी एक चेला जेसको नांव यऊदा इसकरोती तो किछ आदमी लेई करी आया, जिऊँ बेर तलवारी अंर लाठे ते, अंर तिऊँक पुजारीएँ, सास्त्रीएँ, अंर यऊदी लोगु के बाट-बाठे नेताऊँवें ते राखे बेजी। ⁴⁴यऊदाएँ तिऊँ बेर तो राखो बोली कि, “जेसके आऊँ चाटमा सेजाई ईसा अंदा, अंर तुवें तेसके पकड़ीया अंर प्याकरी नेया।” ⁴⁵जबी सो पोऊछीगा तबी तलाई ईसा ढायानठा अंर तेणे बोलो, “ओले गुरजी” अंर तेणे तेसके चाटा। ⁴⁶तबी तिवें तलाई ईसाक पाकड़ी करी आपड़े कबजे मुंझ गाड़ा। ⁴⁷ईसा के चले जे तेस ढायाखड़े ते तिऊँ मुंझी एक चलेएँ आपड़ी तलवार खईची अंर परधान पुजारी के नोकर का कान देना काटी। ⁴⁸तबी ईसाएँ बोलो कि, “का आऊँ चोर अ जो तुवें

मुंखे पकड़ण के अरनीलाठे अंर तलवारी राखी लेई। ⁴⁹आऊँ त रोज तुमुक मंदिर पुण्डे सिखाऊँ ता अंर तारे सात ता रऊँ पर तुवें तला मुंखे पकड़ा ना काईकी ऐओ ऐथु बजेसे ओ कि धर्मशास्त्र की बात पुरी अली। ⁵⁰तबी चेले ईसाक छोड़ी करी बागी नठे। ⁵¹अंर एक जुआन छोरा बिगर गटुणु का ता अंर आपु पाण्डी चादर लपेटी करी ईसा पछीण्डा आया। ⁵²अंर जबी लोगुएँ तेसके पाकड़णा सुचा तबी सो आपड़ी चादर छोड़ी करी नांगा बागी नठा।

ईसाक बेटागंदा लेया

⁵³तबी तिवें ईसाक परधान पुजारी ढायानेया अंर सारे पुजारी, अंर यऊदी लोगु के बाट-बाठे नेता अंर सास्त्री कठे अएँ। ⁵⁴पतरस ईसा पछीण्डा परधान पुजारी के आगंणे पुण्डा नठा अंर तेसके चोकीदारू के सात आगी सेकदा लागा। ⁵⁵सारे यऊदी नेता अंर पुजारी ईसाक मोती कि सजा देण के अरनीसबुत ते लागीएँ ऐरदे पर तिऊँक किछ सबुत ना मिले। ⁵⁶भरीसे आदमीए तेसके बिरोद मुंझ जुटी गबाई बी देनी पर तिऊँकी गबाई आपस मुंझ किछ मेल नु ती खाई। ⁵⁷तबी किछ लोग खड़े अई करी तेसके बिरोद मुंझ गबाई देंदे लागे, ⁵⁸“आमे ऐसके ऐजो बोलअदुई सुण कि आऊँ ऐथु आत के भाणीए मंदिरक ढाई देंदा अंर तीजे दुस पछी बगर आत को चिणीए भाणी देंदा। ⁵⁹ऐथु बाताच बी तिऊँ सबु की गबाई एक जेसी आथी नु ती।

⁶⁰तबी परधान पुजारी बिचंदा खड़ा अवा अंर तेणे ईसा बेरी पुछो, “ऐ लोग तेरे बिरोद मुंझ गबाई लागीए देंदे? का तूँ ईऊँ का जबाब देंदा ना?” ⁶¹पर ईसा चुप रा अंर तेणे कोई जबाब ना देना। तबी परधान पुजारीएँ फेर तेस बेरी पुछो, “का तूँ परम परमेश्वर का बेटा मसी अ?” ⁶²ईसाएँ बोलो, “आऊँ असं अ अंर तुवें आदमी के बेटेक तेस परम परमेश्वर के धईने बिला बेठीएँ अंर स्वरग से बादेच आंदुई देखदे।” ⁶³तबी परधान पुजारीएँ आपड़े गटुणु चीरि करी बोलो, “आमुक ओर गवाऊँ की का जरुवत अ? ⁶⁴तुवें ऐसके निन्दा करदुई सुणी नी गाला? तारी का सलाव अ?” तिवें सबुए बोलो कि, “ऐसके मोती की सजा देओ।” ⁶⁵तबी किछ लोगुएँ तेसींदो थुको, अंर किछ लोगुएँ तेसके आखी पाण्डी पाटी बांधी, अंर चोकीदारूएँ तेसके साटा लाई, अंर किछ लोग ठाटे ऊड़ांदुई बोलअदे लागे, “भविष्यवाणी कर” अंर ऐजो बोलअ कि, “ताऊँखे कुणे मारा?”

पतरस ईसा पछाणनक मुक्री नठा

⁶⁶जबी पतरस आंगणे पुण्डा ता बेठीएँ तबी परधान पुजारी कि एक नोकरीयाण आई। ⁶⁷जबी तियाँएँ पतरसकं आगी सेकदुई देखा तबी तियाँएँ तेसके पछाणी गाला अंर बोलो, “तूँ बी त ईसा नासरी के सात ता” ⁶⁸तबी पतरस मुक्री नठा, अंर तेणे बोलो, “आऊँ झाणीना अंर समजीना कि तूँ का लागीएँ बोलअदी।” तबी सो भाण्डा आंगणे के गेट ढायाबी पोऊँछा, (अंर कुखड़ेई बाँक बी देना।)^९ ⁶⁹तियाँएँ नोकरीयाणी जबी फेर तेसके देखा तबी तेवड़े से जे लोग खड़े ते तिऊँक बोलो, “या आदमी तिऊँ मुंझ का अ।” ⁷⁰पतरस फेर मुक्री नठा। फेर कणीक बिसतोड़े जे लोग तेवड़े खड़े ते तिवें पतरसकं बोलो, “जरूर तूँ तिऊँ मुंझ का एक अ, काईकी तूँ बी गलील का अ।” ⁷¹तबी पतरस कसमा खांदा लागा कि, “जेस आदमी के बारे मुंझ तूँवें बाता लागीएँ लांदे, तेसके आऊँ झाणीना।” ⁷²तलाई कुखड़ेई बाँक देना। अंर पतरसकं ईसा की बोलीएँ बात आद आई कि, “कुखड़े के दुई बेरा बाँक देण से पोईले तूँ मुखे पछाणन से तीन बेरा मुक्री नठदा।” अंर पतरस ऐथु बाताक सुची करी बुकरी बुकरी करी रूदा लागा।

ईसा पिलातुस के सामणी

15¹दोतके रातीएँ बड़े पुजारी, धर्मसास्त्री, अंर यऊदी लोगु के बाट-बाठे नेता अंर बेटागंदे जे लोग ते तिवें ठाटो अंर ईसाक बाधी करी पिलातुस के आतंदा देना सोपी। ²तबी पिलातुसएँ ईसा बेरी पुछो, “का तूँ यऊदीऊँ का राजा अ?” ईसाएँ जबाब देना, “जेसोई तें बोलो अ तेसोई अ।” ³तबी बड़े पुजारीएँ तेस पाण्डी भरी गलतीया लाई। ⁴तबी पिलातुसएँ तेस बेरी फेर पुछो, “का तूँ जबाब देई ना? देख, ईऊँ लोगुएँ ताऊँ पाण्डी कुछी गलतीया लेई लाई।” ⁵पर ईसाएँ तबी बी जबाब देना ना। ऐथु बाताच पिलातुसकं बड़ा ताजुब अवा।

ईसाक मोती की सजा सुणाणी

⁶सारे फसे के तियाँरू मुंझ पिलातुस लोगु के बोलअन पर एक केदीक छोड़ी ता देवं। ⁷बरबा नांव का एक केदी जेला पुण्डा तिऊँ के सात बंद ता जिवें जगड़ी मुंझ खुन ता राखा करी। ⁸लोगुएँ

^९ यूनानी भासा के किछ पुराणे ग्रंथु पाण्डो कुखड़ेई बाँक बी देना मिलीना।

पिलातुसकं बोलो कि, “जेसोई तें सदा आमारे अरनीकरो, तेसोई करा।” ⁹पिलातुसएँ तिऊँ बेरी पुछो कि, “का तुवें ऐजो चांव कि आऊँ तारे अरनीयऊदीयूँ के राजाक छोड़ी देमा?” ¹⁰काईकी पिलातुस ऐजो झाण ता कि बड़े पुजारीएँ ईसाक जिदा का राखा पकड़ी। ¹¹पर बड़े पुजारीएँ बिड़ाक बड़काई अंर तिवें बोलो कि, “ईसा के जागाच आमारे अरनीबरबाक दे छोड़ी” ¹²ऐजो सुणी करी पिलातुसएँ फेर लोगु बेरी पुछो, “त जेसके तुवें यऊदीयूँ का राजा बोलअअं, तेसको में का करनअ?” ¹³सो ललीयांदे लागे कि, “ऐसके कुरुसच चड़ाओ?” ¹⁴तबी पिलातुसएँ फेर लोगु बेरी पुछो, “ऐणे का बुरो करो?” पर लोग ओर जोर से ललीयांदे लागे कि, “ऐसके कुरुसच चड़ाओ।” ¹⁵पिलातुसएँ बीड़ाक खुस करनअ के अरनीबरबाक छोड़ी देना अंर ईसा के कोड़े लुबाई करी कुरुसच चड़ाण के अरनीसोपी देना।

सिपाईयूँएँ ईसा कि बेजती करी

¹⁶सिपाईयूँएँ ईसाक किले बितोड़ी आंगणे पुण्डा लेया अंर सारे सिपाईयूँ कि पुरी पलटण बोईदी। ¹⁷तबी तिऊँवें ईसा बेरी बेंगनी रंग के चोगा बिड़ाएँ अंर मुण्डीयाच काण्डी को मुकुट लाओ। ¹⁸तबी तिऊँवें तेसके ढाल करी अंर बोलो, “यऊदीयूँ के राजा की जेय ओ।” ¹⁹सो तेसके मुण्डीयाँदी लाठे लेई ते मारं, अंर तेसींदो ते थूकं अंर गुण्डी नाई करी तेसके ढाल ते करअ। ²⁰जबी तिवें तेसके ठाटे उढाई ते गाले तबी से बेंगनी चोगा धुर खोलाएँ अंर तेसके गटुण उबे बिड़ाएँ अंर तबी तेसके कुरुसच चड़ाण के अरनीभाण्डा लेया।

ईसाक कुरुसच टांगा

²¹सिकन्दर अंर रूफुस का बाबा शेमोन एक कुरेनी आदमी ता जा गावंदी आई करी तियाँ बाठु ता लागीएँ जांदा सिपाईयूँएँ तेसीच दबाव देना कि ईसा को कुरुस चुंग। ²²तबी ईसाक तीवें गुलगूता नांव के जागाच नेया (जेथुका मतलब अ “खोपड़ीया की जागा”) ²³तेकि तिऊँवें ईसाक मुरब नांव के दबाई मुंझ अंगुर कि गेंगटी मिलाई करी पीणक देनी, पर तेणे तेथुक पी ना। ²⁴तबी तिऊँवें तेसके कुरुसच टांगा अंर तेसके गटणु बांटनक परचीया छोड़ी कि, का कसके मीलदो। ²⁵अंर रातीएँ नअ बजे तिवें तेसके कुरुसच देना टांगी। ²⁶तेसकी गलतीयां एक तखतीया पाण्डी लिखो कि, “यऊदीयूँ का राजा।” ²⁷अंर तेसके साथ दुई चोर ओर बी कुरुसुच टांगे। एक

धईने बीला अंर ओका बावें बिला। ²⁸(“तबी पवित्र शास्त्र की सेई बात पुरी अंणी कि सो चोरु के साथ गिणुंदा”)^१ ²⁹अंर तियाँ बाटु जाण वाड़े लोग मुण्डीया ईलाइ करी तेसकी निंदा ते करं “अंर सो ते बोलअ, “वाआ, मंदीरक डाण वाड़ेए अंर तीजे दुस भाणनं वाड़ेए। ³⁰कुरुसची ऊंदा ऊतरअ अंर आपुक बचा।” ³¹तबी बड़े पुजारी अंर सास्त्री सब तेसके मजाक करदे लागे कि, “एणे ओरुक बचाये पर आपुक ना सका बचाई। ³²एबे ईसराईल का राजा, मसी, कुरुसची ऊंदा ऊतरअ कि आमे ताऊखे ऐरी करी बिस्वास करमे।” अंर जे दुई तेसके साथ कुरुसुच ते टांगीएँ सो बी तेसके ठाटे लागे करदे।

ईसाएँ आपणे पराण देने छोड़ी

³³अंर दुसा के बारअ बजे से लेईकरी तीन बजे दुरी पुरे देस मुंझ ईनीयारो रो छाऊई। ³⁴अंर तीन बजे ईसाएँ जोर से ललियाई करी बोलो, “इलाई, इलाई, लमा सबक्तनी?” जेथु का मतलब अं, “ओ मेरे परमेश्वर, ओ मेरे परमेश्वर तें मुंखे काई देना छोड़ी?” ³⁵तबी जे नजदीक खड़े ते तीऊं मुंझी किछ आदमीएँ ऐजी बात सुणी अंर तबी सो बोलअदे लागे कि, “देखो योऊँ एलियाक लागीये अटांदा।” ³⁶तबी एक आदमी दोड़ी करी आया अंर तेणे कपड़ेक अंगुर को कइवे रस मुंझ बीजाई करी एक लाठेच धरो अंर ईसा बेरी चुसाओ अंर बोलो, “रुकी जाओ, ऐरी करमे कि एलिया ऐसके ऊंदा ऊतारदा आंव कि आई ना” ³⁷तबी ईसाएँ जोर से ललियाई करी आपणे पराण देने छोड़ी। ³⁸तबी मंदिर का परदा ऊगली निंगले दुरी नठा चीरुई अंर दुई टुकड़े गोएँ। ³⁹अंर जा सुबेदार ईसा के सामणी खड़ा ता जबी तेणे ईसाक ललीयाई करी मरदुई देखा तबी तेणे बोलो, “या आदमी साचे का ई परमेश्वर का बेटा ता।” ⁴⁰किछ बेटकुड़ीया दुरेई ऐरदी ती लागीएँ, तिऊं मुंझी मरीयम मगदनी, नेन्द्रा याकूब अंर योसेस की ईजी मरीयम अंर सलोमी ती। ⁴¹जला ईसा गलील मुलकंदा ता तला ऐई बेटकुड़ीया तेस पछीण्डी आई अंर तेसकी सेवा बाड़ी ती करं, अंर भरीसी बेटकुड़ीया बी तेवड़ी ती जेई तेसके सात यरुसलेम ती आई।

^१ यूनानी भासा के किछ पुराणे ग्रंथु पाण्डो 28 पद मिलीना।

ईसाक दबाई देना

⁴²बेठोज के आगले दुस जो तियारी को दुस तो तदुस पाछा बखते ⁴³अरमतिया सईरअ का रण वाड़ा यूसूप आया, जा मासभा का एक स्टदस्य ता अंर आपु बी परमेश्वर के राज्य की बाट ता ऐंर, तेणे ईमत करी अंर पिलातुस राज्यपाल ढायानठा अंर ईसा की लास मांगी। ⁴⁴पिलातुस ताजुब रा मानी कि ईसा ईछे जठ कसा मरा अंर तेणे सुबेदारक बोईदी करी पुछो, “का ईसाक मरी करी भरी बखत गा अई?” ⁴⁵जबी तेणे सुबेदार बेरी आल सुणी गाला तबी लास यूसूपक देनी देई। ⁴⁶तबी यूसूपऐं एक मखमल की चादर मोले गाड़ी अंर ईसा की लास ऊंदे उतारी करी तेथु चादरा बितोड़ी लपेटी, अंर एक कब्रा पुण्डी राखी सेई कबर कईड़ काटी करी ती भाणीऐं अंर कब्रा के मुं पाण्डो एक बड़ो डोक रुड़ाई करी लेओ अंर दे लाई। ⁴⁷मरीयम मगदनी, अंर योसेस की ईजी मरीयम ऐजो ती लागीऐं ऐरदी कि ईसाक कोके लेया राखी।

ईसा को पछी जिण

16¹जबी बेठोज को दुस बिची गो तबी मरीयम मगदनी, अंर याकूब की ईजी मरीयम अंर सलोमीयाँऐं आछे गांधी कि चिजा खरेदी कि ईसा के लासाच गर मे। ²अंर अप्ते के पोईले दुस अईतारे रातीऐं जलाई दूस निकड़ो सो तलाई ईसा के कब्रा ढाई नठी। ³अंर सो आपस मुंझ ती लागीऐं बोलअदी कि, “आमारे अरनीकब्रा के मुवंची ढोक कुण गसारदा?” ⁴जबी तिऊँई ऊबो ऐरो तबी डोक गसारीऐं देखो अंर सो ढोक बेजाई बड़ो तो। ⁵जबी सो कब्रा बितोड़ी नठी तबी तिवें एक जुआन छोरेक धईने बिला बेठीऐं देखा जेस बेर सुकला चोगा ता बीड़िएं, अंर सेजीया तेसीक देखी करी डरी नठी। ⁶जुआन छोरेई बोलो, “डरीयानु तुवें ईसा नासरीक जेसके कुरुसच ता टांगा तेस ऐरदी रोई आई। सो पछी जिऊँदा रा गोई अंर ऐकी आथीना। ऐरी करो ऐजी सेजीई जागा अ जेकी तेसकी लास राखी ती। ⁷तुवें जाओ अंर तेसके चेलीक अंर पतरसक बोलीया कि सो तुमु से पोईले गलील जांदा अंर जेसो तेणे तुमु बेर बोलो तो, सो तुमुक तेकी मिलदा।” ⁸तबी सेजीया कब्रा पुण्डी भाण्डी

आई अंर दोऊड़ी करी नठी। अंर सो घबराई करी कामणुंदी ती लागीऐं अंर तिवें डर को कसी बेर किछ ना बोलो।^१

मरीयम मगदनीयाँक ईसा देखाऊँणा

^९अप्ते के पोईले दुस ईसा पछी जिऊँदे जाण के बाद रातीऐं सबसे पोईले मरीयम मगदनीयाक देखाऊँणा, जियाँदी तेणे सात दुष्टांग ते खेराऐं। ^{१०}तियाँई जाई करी ईसा के सातकिंग बोलो जे शोक मुंझ ते डुबीऐं अंर रुंदे ते लागीऐं। ^{११}जबी तिवें सुणो कि ईसा जिऊँदा अ, अंर तियाँई देखा, तबी बी सो तियाँके बातुक दिजेना।

दुई चेलीक ईसा देखाऊँणा

^{१२}तुथु के बाद ईसा ओके रुप मुंझ दुई चेलीक देखाऊँणा जबी सो गावदी धुर जांदे ते लागीऐं। ^{१३}तिवें जाई करी ऐथु बाता के बारे मुंझ ओरुक बी बोलो पर सो तिऊँक बी दिजेना।

ग्यारअ चेलीक ईसा देखाऊँणा

^{१४}तेथु के बाद ईसा ग्यारअ चेलीक खाण खांदुई देखाऊँणा अंर तेणे तिऊँक धड़े जियंके अंर अबिस्वास के बजे सै बुरजाऐं काईकी तिवें तिऊँच बिस्वास ना करा जिवें तेसके पछी जिण के बाद देखा। ^{१५}अंर तेणे तिऊँक बोलो, “जाओ अंर सारे दुनीयांदा आछे खबरा का परचार करो। ^{१६}जे बिस्वास अंर नाईण करले तिऊँकाई उद्धार अंदा पर जे बिस्वास नु करले सो आपड़े पापु मुंझ ई रंदे अंर तिऊँक सजा मीलदी, ^{१७}बिस्वास करनअ वाड़ी के चिन ऐजे अंदे कि सो मेरे नावं से दुष्टांग खेरांदे अंर नई-नई भासा बोलअदे, ^{१८}सो आतंदे संगीयाड़े चुंगदे अंर जे झईर बी पिले तबे बी तिऊँक किछ नुकसान ना अंदा। सो बिमारुच आत राखदे अंर बिमार ठीक जांदे।”

ईसा को स्वरग जाण

^{१९}प्रभु ईसाक तिऊँसे बाता लाण के बाद स्वरग मुंझ चुंगी नेया अंर परमेश्वर के दर्इने बिला बेठा। ^{२०}अंर चेलीऐं जागा जागा जाई करी परचार करा, अंर प्रभु तिऊँके सात काम ता करं, अंर तिऊँके आत लेयाई जे बड़े बड़े चमतकार ते अं तेथुलेयाई यो साबीत ओ कि प्रभु की बोलीऐं बाता साची अ।

^१ मरकुस किताब किछ पोईले के ग्रंथु पाण्डी अध्याय १६ के आठ आयताच खतम अं।